

#39


穀玉類編

卷三十九至
卷四十四

AE
4
W 284
V. 9



EAST ASIAN LIBRARY
RM 8049 ROBARTS LIBRARY
UNIVERSITY OF TORONTO
TORONTO, CANADA M5S 1A5



穀玉類編卷三十九

休寧 汪兆舒果齋輯

服飾類

巾 裙

衣 履屐

裘

帶

袴

巾

郭林宗嘗於陳梁間行遇雨巾一角墊時人乃故折巾一角以爲林宗巾其見慕如此。後漢書

華歆爲豫章太守孫策畧地江東歆知策善用兵乃幅巾迎策。魏志

沈慶之討北山蠻患頭風嘗着狐皮帽羣蠻畏之號蒼頭公。宋書

武帝賜陶弘景以鹿皮巾。後屢加禮聘。並不出。梁書

獨孤信爲隴右都督。常因獵。馳馬入城。其帽微側。詰旦而吏民有戴帽者。咸側帽焉。其爲士民所重如此。周書

宇文述好着奇服。遇天寒。雲定興謂曰。入內宿衛。必當耳冷。述曰。然。乃製袂頭巾。令深袖耳。世倣之。名爲許公袖勢。隋書

太尉長孫無忌。以烏羊毛爲渾脫氍帽。人多效之。謂之趙公渾脫。唐書

左僕射裴冕。自製巾子。工甚。人爭效之。號僕射巾。

李希顏。邠人。隱居不仕。太祖手書徵之。至京。爲諸王師。諸王就藩。希顏歸舊隱。閭里宴集。嘗着緋袍戴笠往。客問故。笑曰。笠本質。緋

君賜也

明史

嚴德珉擢左僉都御史。以疾求歸。太祖怒黥其面。謫戍南丹。遇赦放還。布衣徒步。自齒齊民。宣德中猶存。有教授與飲。見其面黥。戴敝冠。問老人犯何法。德珉述前事。因言先時國法甚嚴。仕者不保首領。此敝冠不易戴也。乃北面拱手稱聖恩。聖恩云。

衣

范睢更名姓曰張祿。入咸陽相秦。而魏不知。以爲睢已死。魏使須賈於秦。睢爲微行。敝衣之。邸見須賈。賈驚曰。范叔固無恙乎。一寒如此哉。取其一綈袍以賜之。及須賈肉袒謝罪。范睢曰。汝罪有三。然所以得無死者。以綈袍戀戀有故人之意。故釋公。

史記

陳留尹苞與同郡范史雲善。二人俱貧乏。出入共一單衣。到人門外。苞年長。先着單衣。前入。須臾出。解與史雲。後漢書

靈帝用南陽太守羊續爲三司。而求賂。續乃出葛袍以示使者。時

人謠曰。天下清苦羊續祖。

今古善言

司徒王導善於因事。時帑藏空竭。庫中惟有練數千端。鬻之不售。乃與朝賢俱制練布單衣。於是士人競服之。練遂踊貴。晉書

張融爲中書郎。太祖手詔賜融衣。曰。見卿衣服麤故。誠乃素懷有本。交爾藍縷。亦虧朝望。今送一通故衣。意謂雖故。乃勝新也。已令裁減。稱卿之體。并履一量。南齊書

薛平能守法度。理身儉薄。一綠袍不易。恩加朱紱。然後解去。唐書

散騎常侍關文衍。畫九華山於白綾半臂。號九華半臂。自云。令此身常在雲泉之內。青陽記

王溥。洪武末爲廣東參政。其弟自家來省。屬吏與同舟。贈以布袍。溥命還之。曰。一衣雖微。不可不慎。此汙行辱身之漸也。明史

楊繼宗。力持風節。而自處必以禮。爲知府。謁上官。必衣繡服。朝覲謁吏部亦然。或言不可笑。曰。此朝廷法服也。此而不服。將安用之。吳悌授御史。夏言嚴嵩當國。與悌鄉里。嘗謁言。衆見言新服。宮袍競前譽之。悌却立不進。言問故。徐曰。俟談少間。當以政請。言爲改容。

裘

司裘掌爲大裘以共王祀天之服。中秋獻良裘。王乃行羽物。季秋獻功裘以待頒賜。周禮

周昭王以青鳳之毛爲二裘。一曰燠質。一曰暄肌。宋書符瑞志

孟嘗君入秦。秦昭王囚之。使人抵昭王。幸姬求解。姬願得狐白裘。此時孟嘗君有一狐白裘。直千金。天下無雙。入秦獻之。昭王更無他裘。客有能爲狗盜者。夜爲狗入秦藏中取裘。獻幸姬。幸姬爲言昭王。昭王釋孟嘗君。史記

武帝時西域獻吉光裘。入水不濡。上時服此以聽朝。西京雜記

孔廷尉以裘與從弟沈。沈辭不受。廷尉曰。晏平仲之儉。猶狐裘數十年。卿復何辭。此於是受而服之。世說

文惠太子織孔雀毛爲裘。光彩金翠。過於雉頭矣。南齊書

武后賜張昌宗集翠裘。一日令狄仁傑與賭。此裘仁傑指所衣紫絕袍。后曰。不等狄曰。此大臣朝見奏對之服也。昌宗累局連北公。褫裘拜恩而出。唐記

趙孟頫爲翰林承旨。嘗累月不至宮中。仁宗問左右。謂其年老畏寒。勅御府賜貂鼠裘。元史

帶

古者革帶大帶。皆謂之鞶。內則所謂男鞶。革帶也。春秋傳所謂鞶厲大帶也。易言鞶帶。揚子言鞶帨。以至許慎服虔杜預之徒。皆以

鞶爲帶。陳氏禮書

鄭伯之享王也。王以輦鑑予之。左傳

上以紫金帶賜岐王。昔高宗破高麗所得。開元中高麗遣使來朝。因言於內臣曰。本國自亡此帶。歲荒民散。干戈屢起。幸在內帑。一見足矣。上聞之。命封付其使。明皇雜錄

裴度拜淮西宣慰招討處置使。入對延英。曰。主憂臣辱。義在必死。賊未授首。臣無還期。帝壯之。爲流涕。及行。帝賜通天御帶。唐書

太宗嘗得通天犀。命工爲二帶。一以賜寇準。宋史

王禹偁擢右拾遺。賜緋故事。賜緋者給塗金銀帶。太宗特命以文犀帶寵之。

錢武肅時。有獻雲鶴水犀帶者。登碧波亭。繫帶試水。水開七尺許。

宋王介甫所賜玉帶號玉抱肚真宗時趙德明所貢也紹興中王

氏猶藏之曾孫璫始復入禁中

老學菴筆記

焦養直拜典瑞監爲成宗講資治通鑑詔賜金帶遷侍講學士賜

通犀帶

元史

許辰爲正議大夫世祖賜以白玉帶曰以汝明潔無瑕有類此玉故以賜汝

嚴清初拜尚書不能具服色束素犀帶以朝或嘲之曰公釋褐時

七品玳瑁帶猶在耶清笑而已

明史

張居正十五爲諸生巡撫顧璘奇其文曰國器也未幾居正舉於

鄉璘解犀帶以贈。且曰：君異日當腰玉犀，不足溷子。後代高拱爲首輔，倚任益重，勅賜白玉帶。

袴

齊晉之間，袴謂之褰。或謂之襠。關西謂之袴，大袴謂之倒頓，小袴謂之芙蓉衫。楚通語也。方言

韓昭侯有敝袴，命藏之。侍者曰：君亦不仁矣，不賜左右而藏之。昭侯曰：吾聞明主愛一頓一笑，今袴豈特頓笑哉？吾必待有功者。通鑑

司馬相如臨邛酤酒，自著犢鼻褌，與保庸滌器於市中。史記

昭帝上官后，霍光外孫也。光欲后擅寵有子，雖宮人使令皆爲窮袴，多其帶。後宮莫有進者。漢書

秦護清廉不受禮賂家貧衣服單露鄉人歌之曰冬無袴有秦護

謝承後

漢書

劉穆之壞布裳爲袴往見武帝帝謂曰我始舉大義須一軍吏甚急誰堪其選穆之曰無見踰者帝笑曰卿能自屈吾事濟矣

宋書

吉士瞻少時於南蠻國中擲博無禪褰露爲儕輩所侮及爲領軍司馬平魯休烈軍得絹三萬疋乃作百禪其外並賜軍士

南史

裙

成帝與趙后臨太液池后衣南越所貢雲英紫裙風起后揚袖曰仙乎仙乎帝命侍郎持后久之風霽后泣曰帝憐我使不得仙矣他日宮姝幸者或襞裙爲縐號曰留仙裙

飛燕外傳

安樂公主使尚方合百鳥毛織二裙。正視爲一色。旁視爲一色。日中爲一色。影中爲一色。而百鳥之狀皆見。以其一獻韋后。公主初出降。益州獻單絲碧羅籠裙。鏤金爲花鳥。細如絲髮。大如黍米。眼鼻嘴甲皆備。瞭視者方見之。唐書

長安士女春遊。競解裙四圍。謂之裙幄。潛確類書

履屐

屨人掌王及后之服。屨爲赤鳥黑鳥。赤纔黃纔。青句素屨葛屨。辨外內命夫命婦之命。屨功屨散屨。凡四時之祭祀以宜服之。周禮

公孫碩膚。赤鳥几几。詩經

赤芾金舄。會同有繹。

楚子次于乾谿。雨雪。王豹舄以出。左傳

張良年少。游下邳圯上。有老父衣褐至良所。墮其履圯下。顧謂良曰。孺子下取履。良愕然。欲毆之。爲其老。彊忍下取履。父曰。履我。良長跪履之。父以足受。笑而去。曰。孺子可教矣。史記

鄭崇爲尚書僕射。數求見諫。爭每見曳革履。上笑曰。我識鄭尚書履聲。漢書

阮孚歷官吏部尚書。初祖約性好財。孚好屐。同是累而未判其得失。有詣約見正料財物。客至。屏當不盡意。未能平。或有詣阮見自蠟屐。因歎曰。未知一生當着幾量屐。神色閒暢。於是勝負始分。晉書

陶潛去彭澤歸江州。刺史王弘造焉。潛無履。弘顧左右爲之造履。

左右請履度。潛便於坐申脚。令度焉。

抱香履。抱木乘濕時。剡而爲履。出扶南大秦諸國。晉太康六年。扶

南貢百雙。帝深歎異。按東方朔語曰。木履起於晉文公。時介之

推隱。抱樹而死。公撫木哀歎。遂以爲履。

南方草木狀

昔初作履者。婦人員頭。男子方頭。晉太康初。婦人皆履方頭。此與

男無別也。宋孝武世。幸臣戴法興造圓頭履。世人效之。方格之風

盡矣。

宋書

謝靈運尋山陟嶺。常著木履。上山去前齒。下山去後齒。

高祖儉素。宮人盡著紫絲履。

齊書

王遵業官黃門郎。嘗著穿角履。好事者多毀新履以學之。

魏書

北齊沈麟士。性寬恕。一日鄰人認其所著履。麟士曰。是卿履耶。卽脫與。跣而歸。後鄰人得履。送還。前日履曰。非卿履耶。笑而受之。史北

嘯父在曲周市中補市履。數十年。奇其不老。列仙傳

朱桃椎結廬山中。嘗織芒屨置道上。見者曰。居士屨也。爲鬻米茗

易之。唐書

唐宣宗儒雅。令有司效孔子履製進。名魯風鞋。宰相諸王效之。而微殺其式。別呼爲遵王履。清異錄

穀玉類編卷三十九

穀玉類編卷四十

休寧 汪兆舒果齋輯

珍寶類

金

玉

珠

珊瑚

錢

簪釵

手釧界指

金

古者金有三等。黃金爲上。白金爲中。赤金爲下。赤金丹陽銅。史記

揚州荊州貢金三品。書經

夏禹時天雨金三日。古詩云。安得天雨金。使金賤如土。是也。周成

王時咸陽雨金。今咸陽有雨金原。述異記

櫟陽雨金。秦獻公自以爲得金瑞。故作畦時櫟陽而祀白帝。史記

王莽卽眞以朱提銀重八兩爲一流。直一千五百八十。他銀一流

直千。是爲銀貨二品。

朱提縣名出善銀。漢書

魏明帝二年。昆明國貢嗽金鳥。常吐金屑如粟。此鳥畏霜雪。乃起

小屋處之。名辟寒臺。宮人以鳥吐之金飾釵佩。謂之辟寒金。

拾遺記

南康雩都縣西。沿江有石室。名夢口穴。嘗有船人遇一人通身黃

衣。擔兩籠黃瓜。求寄載。過至岸。此人唾盤上。徑下崖。入石穴中。船

主初甚忿之。見其人入石。始知異。視盤上唾。悉是金矣。

述異記

桂陽郡有銀井。鑿之轉深。漢有村人焦先。於半道見三老人。遍身皓白。云逐我太苦。今往他所。先知是怪。以刀斫之三翁。各以杖受

刀忽不見。視其斷杖，是銀。其井遂不生銀也。

麗水在永昌郡。有金浮出其中。乃其品格之異，非他金可比。合璧事類

夏侯詳封豐城縣公。初，吉士瞻浚池，得一金革鉤，鏤甚精巧，篆文

曰：「錫爾金鉤。」且公且侯。士瞻娶詳兄女。女竊以與詳。詳佩之。及是

詳果封侯。而士瞻不錫茅土。南史

齊映罷相，爲觀察使。冀復進，乃獻貢以中帝欲。初，諸藩銀大瓶止

五尺。李兼爲江西，始獻六尺瓶。至映，乃八尺。唐書

太宗問杜鎬曰：「西漢賜予，悉用黃金。近代爲難得之貨，何也？」對曰：

「西漢多金。由彼時佛事未興，金價甚賤也。」宋三朝聖政錄

賀賁，京兆人。嘗治室於毀垣中，得白金七千五百兩。謂其妻鄭曰：

語云。匹夫無故獲千金。必有非常之禍。時世祖以皇弟駐六盤山。乃持五千兩往獻之。世祖曰。天以賜汝。焉用獻。對曰。殿下封秦。金出秦地。此天以授殿下。臣不敢私。且言其子仁傑可用狀。卽召入宿衛。世祖卽位。一日召仁傑。出白金謂曰。此汝父六盤所獻者。聞汝母來。可持以歸。養辭不許。乃歸白母。盡散之宗族。元史

陳觀擢陝西參政。以廉謹稱。或問陝產金何狀。觀大驚曰。吾備位藩寮。何金之問。明史

太監李廣懼罪自殺。孝宗疑廣有異書。使使卽其家索之。得賂籍以進。多文武大臣名。餽黃白米各千百石。帝驚曰。廣食幾何。乃受米如許。左右曰。隱語耳。黃者金。白者銀也。帝怒。下法司究治。諸交

結廣者

玉

越玉五重。弘璧琬琰在西序。大玉夷玉。天球在東序。書經

以玉作六器以禮天地四方。以蒼璧禮天。以黃琮禮地。以青圭禮

東方。以赤璋禮南方。以白琥禮西方。以元璜禮北方。周禮

昭公孫於齊。使公衍獻龍輔於齊侯。齊侯喜與之。陽穀。龍輔玉名左傳

季平子卒。陽虎將以璵璠斂。璵璠美玉君所佩

楚人和氏得玉璞楚山中。獻之厲王。王使玉人相之。曰石也。王以和爲誑。刖其左足。及武王卽位。和又獻之。王使玉人相之。又曰石也。王刖其右足。及文王卽位。和抱其璞而哭於楚山之下。王聞之。

乃使玉人理其璞而得寶焉。遂命曰和氏之璧。韓非子

澹臺子羽渡河。齎千金之璧。河伯欲之。波起兩蛟挾船。子羽操劍擊蛟。皆死。既渡。三投璧於河。河伯躍而歸之。子羽毀而去。示無恡意。博物志

趙惠文王時。得楚和氏璧。秦昭王願以十五城易璧。趙王遣藺相如奉璧入秦。秦王大喜。相如視秦王無意償趙城。乃前曰。璧有瑕。請指示王。王授璧。相如因持璧却立倚柱曰。和氏璧天下所共傳寶也。趙王送璧時。齋戒五日。今大王亦宜齋戒五日。設九賓於庭。臣乃敢上璧。秦王度不可強奪。許齋五日。舍相如傳舍。相如使其從者衣褐懷其璧。從徑道歸。趙秦不以城予趙。趙亦終不予秦璧。

朱暉性矜嚴。驃騎將軍蒼辟之。正月朔。蒼當入賀故事。少府給璧。是時陰。就爲府卿貴驕。蒼坐朝堂。漏且盡。而璧不可得。暉望見少府主簿持璧。卽往給之。曰。我聞璧而未嘗見。請觀之。主簿授暉。暉召令史奉之。主簿驚以白。就就曰。朱掾義士。勿復求。更以他璧朝。蒼旣罷。召暉謂曰。屬者掾自視。孰與藺相如。

後漢書

新蔡王騰。次真定。值大雪。營門前方數丈。雪融不積。騰怪而掘之。得玉馬。高八尺。許表獻之。

晉書

燕王慕容儁時。常山大樹自拔。根下得璧七十珪。七十三光色精奇。有異常。王儁以爲嶽神之命。遣尙書以太牢祀之。

明帝泰始五年。郢州獲元璧。廣八寸五分。安西將軍蔡興宗以獻。後廢帝元徽四年。烏程道人慧獲蒼玉璧。太守蕭惠開以獻。宋書

崔挺爲光州刺史。掖縣有人造州。自稱充使林邑。得一美玉。方尺四寸。甚有光彩。欣逢明治。願奉之。挺曰。吾雖德謝古人。未能以玉爲寶。遣船隨取。光潤果然。竟不肯受。乃表送都。魏書

嘉靖時。製方邱朝日壇。玉爵。購紅黃玉於天方。哈密諸蕃不可得。有通事言。此玉產於阿丹。去土魯番西南二千里。其地兩山對峙。自爲雌雄。或自鳴。請如永樂宣德故事。齎重賄往購。帝從部議已之。明史

于闐國。東有白玉河。西有綠玉河。又西有黑玉河。源皆出崑崙山。

土人夜視月光盛處入水探之必得美玉

珠

三珠樹生赤水上其爲樹如栢葉皆爲珠

山海經

龍珠在頷鮫珠在皮蛇珠在口鼈珠在足魚珠在眼蚌珠在腹然

惟蚌珠爲多餘則偶有之耳又蜘蛛亦有孕珠者

潛確類書

赤松子乘黃蛇入水得黃珠一枚或言是黃蛇之卵故名蛇珠亦

名銷疾珠語曰寧失千里駒不失黃蛇珠

洞冥記

隨侯行遇大蛇中斷使人以藥封之蛇去歲餘銜明珠以報隨侯

因號隨珠

說苑

魏王謂齊王曰寡人國小也尚有徑寸之珠照車前後各十二乘

者十枚。史記

寒山有黑蚌千歲一生珠。燕昭王常懷此珠。當隆暑之月。體自清

涼。號曰銷暑招涼珠。拾遺記

秦始皇至東海。海神捧珠獻帝前。今海畔有秦皇受珠臺。述異記

明月珠。王者不盡介鱗之物。則出。漢景帝時。會稽人朱仲獻三寸

四寸珠。宋書符瑞志

太初三年。起甘泉望風臺。得白珠如花一枝。帝以錦蓋覆之。如照

月矣。因名照月珠。洞冥記

河神獻武帝洞穴珠一枚。帝問東方朔。朔曰。河底有一穴中赤蚌。

生此珠。徑寸明耀絕世。帝寶愛此珠。置於內庫。述異記

孟嘗爲合浦太守。海出珠寶。與交趾比境。常通商販。買先時宰守貪穢。採求不知紀極。珠遂漸徙於交趾郡界。嘗到官。革易前弊。求民病利。曾未踰歲。去珠復還。商貨流通。稱爲神明。後漢書

鮫人從水出。寓人家。賣綃。將去。從主人索一器。泣而成珠。滿盤。以與主人。故曰泉客。慷慨以泣珠。靈異記

張說有一珠。紺色有光。事有遺忘。玩此珠。便心神開悟。名曰記事珠。

開元遺事

同昌公主。夜以琉璃盤盛夜光珠。令人捧立堂中。光明如晝。同昌外傳吐蕃婦人戴瑟瑟珠。珠之最好者。一珠易一良馬。五代史

楊靖爲刑部尙書。嘗鞠一武弁。門卒檢其身。得大珠。屬僚驚異。靖

徐曰。僞也。安有珠大如此者乎。碎之。太祖聞。歎曰。靖此舉有四善焉。不獻朕求悅。一善也。不窮追投獻。二善也。不獎門卒。杜小人僥倖。三善也。千金之珠。卒然而至。畧不動心。有過人之智。應變之才。四善也。

明史

王翺自遼東提督軍務還朝。中官同事者重翺。瞞明珠數顆。翺固辭其人曰。此先朝賜也。公得毋以贓却我乎。不得已納而藏焉。中官死。名其從子還之。

蘇祿國永樂十九年。東王母遣王叔叭都加蘇里來朝。貢大珠一。其重七兩有奇。

珊瑚

珊瑚鉤者王者恭信則見。瑞應圖

積草池中有珊瑚樹高一丈二尺一本三柯是南越王趙佗所獻

號爲烽火樹光景常欲燃。西京雜記

鬱林郡有珊瑚市。鮫人云。海上有珊瑚宮。漢元封二年鬱林郡獻

瑞珊瑚。述異記

光武時南海獻珊瑚婦人帝命植於殿前謂之女珊瑚。一旦柯葉甚茂至靈帝時樹死咸以爲漢亡之徵。

扶南國梁天監二年獻珊瑚佛像。南史

西海中有珊瑚洲。海人乘大舶墮鐵網水底珊瑚初生盤石上。白如菌一歲而黃三歲赤枝格交錯鐵發其根繫網舶上絞而出之。

失時不取卽腐。唐書

趙仲湜酷嗜珊瑚。每把玩不去手。大者一株。至以數百千售之。宋史

宋錢思公性儉約。子弟非時不能取一錢。公有珊瑚筆格。平生珍惜。子弟有欲錢者。卽竊之。公乃榜家庭。以十千購。子弟佯爲求得。以獻。公欣然以十千與之。一歲中率五七如此。歸田錄

郭侃西征。至西戎國。得五尺珊瑚燈檠。元史

南渤利國西北海中有山甚高大曰帽山。近山淺水內生珊瑚樹。

高者三尺許。明史

阿丹國永樂時中官往市。得珊瑚樹高二尺者數枚。

錢

錢泉也。其藏曰泉。其行曰布。取名流行無不徧也。周禮注

南方有虫名青蚨。母子不離。取其子。母即飛來。以母血塗錢八十文。以子血塗錢八十一文。每市物。或先用母錢。或先用子錢。皆復飛歸。輪轉無已。搜神記

文帝時。鄧通得賜蜀銅山。聽得鑄錢。文字肉好。皆與天子錢同。故富侔人主。時吳王亦有銅山鑄錢。西京雜記

武帝時。令京師鑄官赤仄。一當五賦。官用非赤仄不得行。漢書

劉寵為會稽太守。郡中大化。徵為將作大匠。有五六老叟。自若邪山間出。人齎百錢送寵。寵曰。勤苦父老。為人選一大錢受之。後漢書

王衍疾妻郭之貪鄙。口未嘗言錢。郭欲試之。令婢以錢繞床。使不

得行。衍晨起見錢。謂婢曰。舉阿堵物却。晉書

魯褒傷時之貪鄙。著錢神論以刺之。曰。錢之爲體。有乾坤之象。親之如兄。字曰孔方。無德而尊。無勢而熱。排金門而入紫闥。危可使安。死可使活。貴可使賤。生可使殺。是故爭忿非錢不勝。幽滯非錢不拔。怨讐非錢不解。令聞非錢不發。洛中朱衣。當塗之士。愛我家兄。皆無已已。諺曰。錢無耳。可使鬼。凡今之人。惟錢而已。

宋泰始中。世祖於青溪宅。得錢一枚。文有北斗七星雙節。又有人形帶劍。及治盆城。又得一大錢。文曰太平百歲。南齊書

名稱榆莢。非投飲馬之橋。價重園泉。寧棄咒雞之野。青鳬委質。笑

夷甫之不言。赤仄垂緡。量河間之能數。陳張正見

謝錢啟

謝諼爲東陽內史。及還。五官送錢一萬。止留一百。曰：數多劉記。更以爲愧。南史

元慶智性貪鄙。爲太尉主簿。事無大小。得物然後判。或十數錢。或二十錢。得便取之。府中號爲十錢主簿。北史

袁正辭積錢盈室。室中常有聲。人以爲妖。勸其散積以禳之。正辭曰：吾聞物之有聲。求其同類耳。宜益以錢。聞者傳以爲笑。五代史

驍騎將軍張籛。始在雍州。有黃雀銜一銅錢。置之而去。未幾。於衙院見二雀相鬪。畢。各賺一錢。落於地。籛以三錢祕於巾箱。識者以爲大富之徵。石晉書

李時勉爲侍讀學士。宣宗幸史館。撒金錢賜諸學士。皆俛取。時勉

獨正立。帝乃出餘錢賜之。

明史

玉亭縣君伊府宗室女。適楊仞。早卒。家日落。萬歷中。河南大饑。宗祿久缺。紡績三日。不得一餐。母子相持慟哭。夜分。夢神語曰。汝節行上聞於天。當有以相助。晨興。母子述所夢。皆符。頗怪之。其子曰。取屋後土。作坯。易粟。其日堀土。得錢數百。自是每堀。輒得錢。延兩月餘。官俸亦至。人以爲苦節所感。

簪釵

趙平原君使人於春申君。欲夸楚。爲瑇瑁簪。

史記

景帝沒入鄧通家財。一簪不得著身。

漢書

武帝過李夫人。就取玉簪搔頭。自後宮人搔頭皆用玉。

西京雜記

武帝起招靈閣有神女留一玉釵與帝帝以賜趙婕妤至昭帝元鳳中宮人見此釵光瑩甚異謀欲碎之明日視釵匣惟見白燕直升天去後宮人常作玉釵因名玉燕釵述異記

趙后手抽紫玉九雛釵爲昭儀簪髻飛燕外傳

班固與弟超書云今遣仲升以黑犀簪隋書禮儀志

盤龍釵梁冀婦所制古今注

魏文帝遣使於吳求通犀簪羣臣曰貢有常典魏所求非法宜勿與孫權曰彼在諒闇之中而所求若此寧可復與言禮皆備以付使江表傳

右將軍周盤龍有愛妾杜氏高帝送金釵鐺二十枚手敕曰餉周

公阿杜

南齊書

大歷中。日林國獻龍角釵。類玉而紺色。精巧奇麗。代宗以賜獨孤妃。妃與帝遊龍池。有紫雲自釵上起。俄頃滿於舟上。釵遂化。二龍

騰空而去。

杜陽雜編

同昌公主有九玉釵。上刻九鸞有字曰玉兒。工巧殆非人製。

同昌外傳

唐世俗尚以琉璃爲釵釧。

唐書

李宸妃初爲司寢。有娠。從眞宗臨砌臺。玉釵墜。妃惡之。帝心卜釵

完當爲男子。左右取以進。釵果不毀。已而生仁宗。

宋史

宋彭思永八九歲時。晨出就學。拾一金釵。默坐其處。以候訪者。有

一吏徘徊久之。問故。果墜釵者。付之。吏謝以金。不受。

山堂肆考

手釧與指

環臂謂之釧。通俗文

古者后妃羣妾御於君所。當御者以銀鑲進之。娠則以金鑲退之。

本三代之制。卽今界指。五經要義

戚姬以百鍊金爲彊環。照見指骨。上惡之。以賜侍兒各四枚。西京雜記

趙婕妤上趙后二十六物。有精金彊環四指。飛燕外傳

南夷元嘉七年遣使獻金剛指環。宋書

東昏侯潘妃嘗市琥珀釧一雙。直百七十萬。南齊書

上嘗曰。我祖破高麗獲二寶。一紫金帶。一紅粟玉臂支。朕以玉臂

支賜妃子。明皇雜錄

唐德宗一日問宰臣古詩云輕衫襯跳脫跳脫是何物宰臣未對

上曰卽今之腕釧也真誥言安妃有斷粟金跳脫是臂飾

全唐詩話

韋臯遊江夏與一青衣玉簫有情約七年再會留玉指環踰八年

不至玉簫絕食而歿後得一歌姬真如玉簫中指有肉隱出如玉

環

雲溪友議

何充妓於後閣以翡翠指環換刺繡筆充知嘆曰此物洞仙與我

欲保長年之好乃令蒼頭急以蜻蜓帽贖之

粧樓記

岳柱性穎悟方八歲觀何澄畫陶母剪髮圖柱指陶母手中金釧

詰之曰金釧可易酒何用剪髮爲也何大驚異之

元史

穀玉類編卷四十一

休寧 汪兆舒果齋輯

兵器類

弓

矢

刀

劍

槍

弓

黃帝命揮作弓。世本

黃帝鑄鼎成。有龍垂胡。導下迎帝。帝上騎。墮帝弓。百姓乃抱其弓。

與胡導號。因名其弓曰烏號。史記

司弓矢掌六弓之法。王弓。弧弓。以授射甲革。楯質者。夾弓。庾弓。以

授射豸侯鳥獸者唐弓大弓以授學射者使者勞者

周禮

諸侯敵王所愾而獻其功王於是乎賜之彤弓一彤矢百旅弓矢

千以覺報宴

左傳

成王分魯公以封父之繁弱

繁弱弓名

楚子享公於新臺好以大屈

大屈弓名

定公侵齊士皆坐列曰顏高之弓六鈞皆取而傳觀之

晉平公使弓工為弓三年乃成公引弓而射不穿一札公怒將殺

弓人其妻見公曰妾夫造此弓勞矣其幹生太山之阿傅以燕牛

之角纏以荆麋之筋糊以阿魚之膠此四者天下之妙選而君不

穿一札是君不能射也妾聞射之道左手如矩右手如附枝右手

七言詩集卷之七

發之左手不知。平公如其言而射。穿七札。乃賜之金十鎰。列女傳

蘇秦說韓王曰。天下之彊弓勁弩。皆從韓出。谿子少府。時力距來

者。皆射六百步之外。史記

宋弓弩院。歲造角色弓。白樺弓。虎翼弩。馬黃弩。牀子弩。太祖嘗令

試牀子弩於郊外。矢及七百步。又令別造千步弩。試之。矢及三里。

文獻通考

和詵知雄州。上制勝強遠弓式。能破堅於三百步外。邊人號爲鳳

凰弓。宋史

楊存中善射。嘗以尅敵弓雖勁。而蹶張難。遂以意創馬皇弩。思巧

製工。發易中遠。

馮勝破擴廓帖木兒凱旋論功封宋國公洪武五年以勝宣力四方與魏國公徐達曹國公李文忠各賜彤弓明史

矢

黃帝命夷牟作矢世本

垂之竹矢在東房書經

司弓矢掌八矢之法枉矢挈矢利火射用諸守城車戰殺矢鏃矢

用諸近射田獵矰矢箛矢用諸弋射恒矢庫矢用諸散射周禮

乘邱之役莊公以金僕姑射南宮長萬金僕姑矢名○左傳

乾時之役申孫之矢集於桓鉤申孫矢名○國語

有隼集於陳廷而死楷矢貫之石砮矢長尺有咫滑公使使問仲

尼仲尼曰。隼來遠矣。此肅慎之矢。昔武王克商。肅慎貢楛矢石磐。長尺有咫。先王欲昭其令德。故分陳以肅慎矢。試求之。故府果得之。史記

奚康生驍勇。弓力十石。矢異常箭。肅衍特作大弓兩張。送與康生。康生用平射。猶有餘力。其弓長八尺。箭麤。殆如長笛。魏書

太宗初。爲秦王。弧矢制倍於常。逐劉黑闥也。爲突厥所窘。自以火箭射却之。突厥得箭。傳觀以爲神。後餘大弓一。長矢五。藏之武庫。世寶之。唐書

范恪爲慶州都巡檢使。有弓勝一石七斗。其箭鏃如鐔。名曰鐔弓。凡所發必中。至一箭貫二人。他日取蕉蒿若歸。恪獨殿後。爲數千

騎所襲恪視矢簋止有二鐔卽爲引滿之勢賊遽却宋史

吳玠保和尚原金人來攻玠命諸將選勁弓強弩分番注射號注隊矢連發不絕兀術中流矢僅以身免

刀

赤刀在西序赤刀赤削也○書經

公子友敗莒師於麗友謂莒拏曰吾二人不相說士卒何罪屏左右而相搏友處下左右曰孟勞孟勞魯之寶刀也友以殺之穀梁傳

武帝解鳴鴻之刀賜東方朔朔曰此刀黃帝采首山之銅鑄之雄已飛去雌者猶存帝臨崩恐人得此刀欲銷之刀化爲鵲赤色飛入雲中洞冥記

吳大帝有寶刀三。一曰百鍊。二曰青犢。三曰漏景。

古今注

魏太子不造寶刀三。其一文似靈龜。名靈寶。其一彩似丹霞。名含章。其一鋒似崩霜。刀身劍缺。名素質。

典論

蒲元性多奇思。於斜谷口。爲諸葛武侯鑄刀三千口。自言漢水鈍弱。不任淬用。蜀江爽烈。命人於成都取江水。蒲以淬刀。又嘗以竹筒納鐵珠。蒲中舉刀斷之。應手虛落。名曰神刀。

世說

呂虔有佩刀。工相之以爲必登三公。可服此刀。虔謂王祥曰。苟非其人。刀或爲害。卿有公輔之量。故以相與。祥辭強之。乃受。臨薨。以刀授其弟覽。曰。汝後必興。足稱此刀。覽後世多賢才。興於江左。

晉書

夏王赫連勃勃造百鍊剛刀。爲龍雀大環。號曰大夏龍雀。銘其背。

卷二 類系 名四二
曰古之利器。吳楚湛盧。大夏龍雀。名冠神都。可以懷遠。可以柔邇。如風靡草。威服九區。

范文曰。南夷奴也。嘗牧牛澗中。獲二鯉魚。化成鐵。用以為刀。刀成。乃對大石嶂而祝之曰。鯉魚變化。治成雙刀。石嶂破者。是有神靈。遂斫之。石即瓦解。文知其神。乃懷之。至林邑。自立為王。

王恂。武力絕人。嘗行凌水濱。得一古刀。其背銘曰。舉無不克。動必成功。常佩之。每有警。必先鳴。故所向皆捷。元史

劍

龍泉太阿。干將鑢鈇。斷蛇魚腸。純鉤燕支。葵偷屬鏤。干豚棠谿。墨陽巨闕。辟閭並劍名。廣雅

周穆王征西戎。西戎獻鉞。鉞之劍長尺有咫。用之切玉如泥。焉孔叢

子
吳王闔閭使干將作劍。干將采五山之鐵精。六合之金英。候天伺地。而金鐵之精不銷。其妻莫邪曰。神物之化。須人而成。乃斷髮剪爪。投於鑪中。金鐵皆濡。遂成二劍。陽曰干將。陰曰莫邪。陽作龜文。陰作漫理。干將出其陰而獻之。闔閭甚重之。吳越春秋

越王句踐有寶劍五。聞於天下。客有能相劍者薛燭。王召而示之。取毫曹巨闕。燭曰。非寶劍也。王取純鉤。燭忽如敗如悟曰。此所謂純鉤耶。當造此劍之時。赤堇之山破而出錫。若耶之溪涸而出銅。太一下觀天精下之。歐冶乃因天之精神。悉其伎巧。一曰湛盧。二

曰純鉤。三曰勝邪。四曰魚腸。五曰巨闕。今赤堇山已合。若耶溪深而不測。歐冶已死。雖傾城量金珠玉。竭河猶不能得此一物。越絕書

漢帝相傳。以高祖斬白蛇劍。上有七采珠九華玉爲飾。劍在室中。

光景猶照於外。開匣拔鞘。輒有風氣。光彩射人。

西京雜記

韓稜爲尚書令。與僕射郅壽。尚書陳寵同時。肅宗嘗賜諸尚書劍。惟此三人。特以寶劍。手署其名。曰韓稜。楚龍淵。郅壽。蜀漢文。陳寵。

濟南椎成。

後漢書

吳大帝有寶劍六。白虹。紫電。辟邪。流星。青冥。百里。

古今注

魏太子丕造寶劍。一曰飛景。二曰流彩。三曰華鋒。

典論

張華博物洽聞。斗牛之間。常有紫氣。華與雷煥仰觀煥曰。寶劍之

精上徹於天耳。華曰：君言得之。任何郡？曰：在豫章豐城。華喜，補煥豐城令。煥到縣，掘獄屋地，得一石函，光氣非常，中有雙劍，並刻題：一曰龍泉，一曰太阿。其夕，斗牛間，氣不復見。焉遣使送一劍與華，留一自佩。或謂煥曰：得兩送一，張公豈可欺乎？煥曰：本朝將亂，張公當受其禍。此劍當繫徐君墓樹耳。靈異之物，終當化去，不永爲人服也。華得劍，寶愛之。報煥書曰：詳觀劍文，乃干將也，莫邪何復不至？雖然，天生神物，終當合耳。華誅，失劍所在。煥卒，煥子華持劍行，經延平津，劍忽於腰間躍出，墮水，使人沒水取之，不見劍。但見兩龍，各長數丈，波浪驚沸。於是失劍。華歎曰：先君化去之言，張公終合之論，此其驗乎。

晉書

劉曜初隱迹管涔山。夜有二童子跪曰。管涔王使臣謁趙帝。獻劍一口而去。劍長三尺。光澤非常。赤玉爲室。背上有銘曰。神劍御除衆毒。曜遂服之。劍隨四時而變爲五色。

代州進士李光輔善擊劍。詣闕。帝曰。若獎用之。民悉好劍矣。遣還。宋史

孫炎雅負經濟。授總制。太祖命招劉基。章溢。葉琛等。基不出。炎使再往。基遣以寶劍。炎作詩以爲劍。當獻天子。斬不順命者。人臣不敢私封還之。遺基書數千言。基始就見。送之建康。明史

盧象昇總督宣大山西軍務。愛才惜下。如不及。三賜尚方劍。未嘗戮一偏裨。

槍

矛丈八者謂之稍。通俗文

師及齊師戰於郊。冉有用矛於齊師。故能入其軍。左傳

桓宣武與殷劉談。不如甚。取黃皮袴褶上馬舞。稍數迴。或向殷。或

擬劉。意氣始得雄。世說

羊侃爲梁侍中。時少府新造兩刃稍。成長二丈四尺。圍一尺三寸。

武帝賜侃紫騮。令試之。侃執稍上馬。左右擊刺。特盡其妙。觀者登

樹。帝曰。此樹必爲侍中折矣。俄而果折。因號此稍爲折樹稍。南史

于栗磾爲河內鎮將。劉裕之伐姚泓。遺書栗磾。假道。題書曰。黑稍

公麾下。栗磾表聞。明元因授栗磾黑稍將軍。栗磾好持黑稍。裕望

而異之。故有此號。北史

尉遲敬德善避稍。每單騎入賊。雖羣刺之。不能傷。又能奪取賊稍。還刺之。太宗嘗問。奪稍與避稍孰難。對曰。奪稍難。試與齊王元吉戲。少選。齊王三失稍。遂大愧服。唐書

王彥章驍勇。持一鐵鎗。騎而馳突。奮疾如飛。而他人莫能舉也。軍士號王鐵槍。五代史

抹撚史挖搭。所用槍長二丈。軍中號爲長槍副統。金史

隋世昌鍛渾鐵爲槍。重四十餘斤。能左右擊刺。宋兵聞鐵槍名。不敢近。元史

雞籠山國善用鏢槍。竹柄鐵鏃。鈔甚。冬月聚衆捕鹿。鏢發輒中。積

如坵山 明史

甲

葛廬之山出黃金。蚩尤制以爲鎧。鎧甲也。管子

幽人爲甲。犀甲七屬。兕甲六屬。合甲五屬。犀甲壽百年。兕甲壽二

百年。合甲壽三百年。考工記

闕鞞之甲。武所以克商也。左傳

楚使鄧廖帥組甲三百。被練三千。以侵吳。

楚人鮫革犀兕。所以爲甲。堅如金石。史記

張翥拜大將軍。隋文帝賜之緣沉甲。虎文具裝。北史

馬燧爲河中節度使。造鎧必短長三制。稱士所衣。以便進趨。唐書

河中節度使徐商。襪紙爲鎧。勁矢不能洞。

祈廷訓。從周世宗征淮南。賜以明光細甲。宋史

馬知節簽書樞密院事。自陳年齒未衰。尚可驅策。如邊方有警。得輕甲一聯足矣。真宗命製鋼鐵鎖子甲賜焉。

孫威善爲甲。嘗製蹄筋翎根鎧。以獻太祖。親射之。不能徹。大悅。元史耶律鑄從憲宗征蜀。賜以尚方金鎖甲。

洪武元年。令製軍士衣。表裏異色。謂之鴛鴦戰襖。以新軍號。明史

胄

獻甲者執胄。胄。兜鍪也。禮記

公徒三萬。貝胄朱綬。詩經

晉楚遇于郢陵。卻至三遇。楚子之卒見楚子。必下。免胄而趨風。左傳

楚白公作亂。葉公子高入及北門。或遇之曰。君胡不胄。國人望君。如望慈父母焉。盜賊之矢。若傷君。是絕民望也。乃胄而進。又遇一人曰。君何胄。國人望君。如望歲焉。若見君面。其亦夫有奮心而掩面以絕民望。不亦甚乎。乃免胄而進。

突厥寇并州。薛仁貴將兵擊之。虜問唐將爲誰。曰。薛仁貴。虜曰。吾聞仁貴流象州。死久矣。何給我仁貴。免胄示之面。虜相顧失色。下馬列拜。稍引去。通鑑

吐蕃回紇等入寇。天子召郭子儀屯涇陽。回紇欲見子儀。子儀但與數騎出。免胄見其大酋。回紇舍兵拜曰。果吾父也。唐書

羅亨信巡撫宣府大同。土木之變。關門左右皆戰場。亨信以孤城當其衝。外禦強寇。內屏京師。勞績甚著。著兕、盔、處、顛、髮、盡、脫。明史

穀主類編卷四十二

休寧 汪兆舒果齋輯

飲食類

茶

酒

穀

餅

菜

茶

嘉雀舌之纖嫩。玩蟬翼之輕盈。冬芽早秀。麥穎先成。雲垂綠脚。香浮碧乳。挹此霜華。却茲煩暑。清文既傳於杜毓。精思亦聞於陸羽。

杜毓毓有薺賦也。吳叔茶賦

天子未嘗陽羨茶。百草不敢先開花。仁風暗結珠蓓蕾。先春抽出

黃金芽一椀。喉吻潤。二椀破孤悶。三椀搜枯腸。惟有文字五千卷。
四椀發輕汗。平生不平事。盡向毛孔散。五椀肌骨清。六椀通仙靈。
七椀吃不得也。惟覺兩腋習習清風生。

盧仝
茶歌

劍南有蒙頂石花。湖州有顧渚紫筍。峽州有碧澗明月。邛州有火
井。思安。建州有先春龍焙。渠江有薄片。巴東有真香。福州有栢岩。
洪州有白露。涪州有賓花。穆州有鳩院。潭州有鐵色。夷陵有壓磚。
常之陽羨。婺之舉岩。匡廬山之陽坡。龍安之騎火。黔陽之都濡。高
株。瀘州之納溪梅嶺。數者其名皆著。品之則石花最上。紫筍次之。
國史補

王肅初入國。常飲茗汁。經數年後。食酪粥甚多。高祖謂肅曰。茗飲

酪漿何如。肅曰：惟茗不中與酪作奴。人因號茗飲爲酪奴。伽藍記

陸羽嗜茶，著經三篇，言茶之原之法之具尤備。時鬻茶者至陶羽形，祀爲茶神。有常伯熊者，因羽論，復廣著茶之功。御史大夫李季卿宣慰江南，次臨淮，知伯熊善煮茶，召之。伯熊執器前，季卿爲再舉杯。至江南，又有薦羽者，召之。羽衣野服，挈具而入。季卿不爲禮，羽愧之，更著毀茶論。其後尚茶成風，回紇入朝，始驅馬市茶。唐書

茶之佳者，造在社前，其次火前，其下雨前，故齊己曰：高人愛惜藏

巖裏，白蜃封題寄火前。學林新編

茶之品莫貴於龍鳳團，凡八餅重一斤。蔡君謨爲福建運使，始造小片龍團，其品精絕，謂之小龍團，凡一斤直金二兩，每南郊致齋

中書樞密各賜一餅。宮人往往綴金其上。其貴重如此。茶譜

覺林院僧志崇收茶爲三等待客。以驚雷莢自奉。以萱草帶供佛。以紫茸香蓋取上等供佛也。蠻歐志

上供茶。天下貢額四千有奇。福建建寧所貢最爲上品。有探春。先春。次春。紫筍。及薦新等號。舊皆採而碾之。壓以銀版。爲大小龍團。太祖以其勞民罷造。惟令採芽茶以進。復上供五百家。明史

酒

酒正掌酒之政令。以式法授酒材。辨五酒之名。一曰泛齊。二曰醴齊。三曰盎齊。四曰緹齊。五曰沉齊。辨三酒之物。一曰事酒。二曰昔酒。三曰清酒。凡祭祀以法共五齊三酒。以實八尊。周禮

酒一也而有清濁厚薄甜苦紅綠白之別故清者曰栗清而甜者曰醴濁者曰醢亦曰醢濁而微清者曰醖厚者曰醇亦曰醢重釀者曰醢三重釀曰酎薄者曰醢甜而一宿熟者曰醢美者曰醢苦者曰醢紅者曰醢綠者曰醢白者曰醢又有酒材焉秫稻是也又有酒母焉麴蘖是也

飲膳標題

文王飲酒千鍾孔子百觚言聖人德盛能以德將酒也如一坐千鍾百觚此酒徒非聖人也

論衡

魏文侯與大夫飲酒使公乘不仁爲觴政曰飲不醢者浮以大白文侯飲而不盡醢不仁舉白浮君君不應不仁曰君已設令令不可行乎君曰善舉白而飲

說苑

廷尉于定國飲酒至數石不亂冬月治請讞飲酒益精明漢書

鄭元爲袁紹所辟及去紹餞之城東會者三百餘人皆離席奉觴自旦至暮度元飲三百餘杯而溫克之容終日無怠高士傳

邴原游學八九年間酒不向口臨別師友會米肉送原原曰本能飲酒但以荒思廢業故斷之今當一飲於是共飲終日不醉邴原別傳

昔劉元石於山中沽酒酒家與千日酒至家當醉而家人不知以爲死也權葬之酒家計千日滿往視之於是開棺醉始醒博物志

徐邈爲尚書郎時科禁酒而邈私飲至醉校事趙達問以曹事邈曰中聖人達白之太祖太祖怒度邈將軍鮮于輔進曰平日醉客謂酒清者爲聖人濁者爲賢人邈性脩慎偶醉言耳得免刑魏志

司徒山濤飲酒至八斗方醉。武帝欲試之，乃以酒八斗飲濤，而密益其酒，濤極本量而止。晉書

何充能飲酒。劉惔每云：「見次道飲，令人欲傾家釀。」言其能溫克也。孟嘉好酣飲，愈多不亂。桓溫問嘉：「酒有何好而卿嗜之？」嘉曰：「公未得酒中趣耳。」

桓公有主簿善別酒，好者爲青州，從事惡者謂平原督郵。青州有齊郡，平原有鬲縣。從事言到臬，督郵言在鬲上住。世說

河東人劉白墮善釀酒，飲之香美，醉而經月不醒。朝貴遠相餉饋，號曰鶴觴。青州刺史齋酒之，番路逢劫盜，飲之卽醉，皆被擒獲。游俠語曰：「不畏張弓拔刀，惟畏白墮春醪。」伽藍記

柳謩之飲酒至石不亂每梁陳使至輒令謩之接對

隋書

王績嗜酒以前官待詔門下省故事官給酒日三升或問待詔何樂答曰良醞可戀耳侍中陳叔達聞之日給一斗時稱斗酒學士著醉鄉記以次劉伶酒德頌其飲至五斗不亂著五斗先生傳

唐書

李白供奉翰林猶與飲徒醉於市白與賀知章李適之汝陽王璣崔宗之蘇晉張旭焦遂爲酒八仙人

御營都巡檢王審琦素不能飲嘗侍宴太祖酒酣仰祝曰酒天之美祿審琦朕布衣交也方與朕共享富貴何靳之不令飲耶祝畢顧謂審琦曰天必賜卿酒量試飲之審琦受詔飲十杯無苦自此侍宴常引滿及歸私家卽不能飲

宋史

錢儼善飲酒。百卮不醉。居外郡。常患無敵。或言一軍校差可倫擬。儼問其狀。曰。飲益多。手益恭。儼曰。此亦變常。非善飲也。

種放嗜酒。常種秫自釀。曰。空山清寂。聊以養和。因號雲溪醉侯。

蘇子美好飲酒。在外舅杜祁公家。每夕讀書。以一斗爲率。公深以爲疑。密使覘之。子美讀漢書張良傳。至良與客狙擊秦皇帝。撫案曰。惜乎擊之不中。遂滿引一大白。又讀至良曰。始臣起下邳。與上會於留。此天以臣授陛下。又撫案曰。君臣相遇。其難如此。復舉一大白。公笑曰。有如此下物。一斗不足多也。世說

察罕拜參知政事。仁宗嘗賜枸杞酒。曰。以益卿壽。元史

郭興季弟德成。性通敏。嗜酒。兩兄積功至列侯。而德成止驍騎舍

人太祖以寧妃故欲貴顯之德成辭帝不悅頓首謝曰臣性耽麪藥庸闇不能事事位高祿重必任職司事不治上殆殺我人生貴適意但多得錢飲醇酒足矣餘非所望帝稱善賜酒百罌金幣稱之寵遇益厚

明史

陳敬宗爲南京祭酒性善飲酒至數斗不亂襄城伯李隆守備南京每留飲聲伎滿左右竟日舉杯未嘗一盼其嚴重如此

陶人之爲器有酒經焉晉安人盛酒似瓦壺之製小頸環口脩腹受一斗凡饋人書一經或二經或五經他境人不達其義聞五經至東帶迎於門乃知是酒五瓶爲五經也

羣碎錄

穀

五侯不相能。賓客不得來往。惟樓護豐辨。傳食五侯間。各得其懽心。競致奇膳。護乃合以爲鯖。世稱五侯鯖以爲奇味。西京雜記

羊曼爲丹陽尹。時朝士過江。初拜官。必飭供饌。曼拜丹陽。客來早者得佳設。日晏則漸罄。不復及精。隨客早晚。而不問貴賤。有羊固拜臨海太守。竟日皆美。雖晚至者。猶獲盛饌。論者以固之豐饌。不如曼之真率。晉書

阮佃夫奢侈。中書舍人劉沐嘗詣之。遇佃夫出行。中途相逢。要沐同返。就席。便命施設。一時珍肴。莫不畢備。宋書

豫章內史虞悛。善爲滋味。和齊皆有方法。豫章王嶷盛饌享賓。謂悛曰。肴羞有所遺不。悛曰。恨無黃頤臠。何曾食䟽所載也。世祖就

棕求扁米糲。棕獻糲。及雜肴數十輩。大官鼎味不及也。

南齊書

崔瞻在御史臺。恒宅中送食。備盡珍羞。有一姓裴御史。伺瞻食。往造焉。瞻不與交言。又不命匕箸。裴觀瞻食罷而退。明日自攜匕箸。恣情飲噉。瞻曰。我初不喚君食。遂能不拘小節。昔劉毅在京口。冒請鵝炙。豈亦異是。君定名士。於是每與之同食。

北史

駱賓王謂盛饌為炊金饌玉。

拾遺記

宰相裴冕。食飲皆珍豐。每廣會。賓客不能名其饌。

唐書

韋陟廚中飲食。香味錯雜。人入其中。多飽飫而歸。時人為之語曰。

人欲不飯筋骨舒。黃緣須入郇公廚。

陟封郇國公。世說

宰相段文昌精饌事。第中庖所。榜曰鍊珍堂。在途號行珍館。

清異錄

孫承祐在浙右會食。指盤筵謂客曰。今日坐中南之蝻。北之紅羊。東之鰕魚。西之棗栗。無不畢備。可謂富有四海矣。

張秉好潔饌具。每公宴。及朋友家集會。多自挈肴膳而往。家甚貧。常質衣以給費焉。宋史

周應秋生平無特操。避東林。謝病去。魏忠賢起爲侍郎。尋改都御史。家善烹飪。每魏良卿過。進豚蹄留飲。良卿大歡。時號煨蹄總憲。明史

餅麵食附

餅謂之飢。或謂之餽。或謂之餽。方言

五月麥熟薦新。作起漉白餅。徐暢祭祀記

餅。漉麥麴所爲。或合爲之。入爐熬者。名熬餅。亦曰燒餅。入籠蒸者。名蒸餅。入湯烹之。名湯餅。其他豆屑雜糖爲之。曰環餅。和乳爲之。曰乳餅。餅餌閒談

樊曄爲河東都尉。引見雲臺。初光武微時。以事拘於新野。曄爲市吏。餽餌一笥。帝德之不忘。因戲之曰。一笥餅得都尉何如。餅餌也。後漢

書

何戢爲司徒左長史。太祖爲領軍。與戢來往。數置歡宴。上好水引餅。戢令婦女躬自執事。以設上焉。南齊書

明帝儉約。大官進御食。有裹蒸。帝曰。我食此不盡。可四片破之。餘充晚食。

王罷鎮河東。嘗有臺使罷爲設食。使乃裂去薄餅緣。罷曰。耕種收穫其功已深。春爨造成。用力不少。爾之選擇。當是未飢命。左右撤去之。使者大慚。北史

餠餹滑而美。按餠餹。起餅也。發酵使麵輕高浮起。炊之。賈公彥以爲起膠餅也。齊民要術

范忠宣謫居永州。以書寄人云。此中羊麵無異北方。每日閉門餐餚。餹不知身之在遠。北人食麵名餚餹。世說

危素至正時爲翰林編修。纂后妃等傳事。逸無據。素買餹餅饋宦寺。叩之得實。乃筆諸書。卒成全史。明史

菜

我有旨蓄。亦以御冬。詩經

周原膾膾。葍荼如飴。

桓帝時五穀不登。詔令郡國種蕪菁以助人食。

蕪菁俗呼蘿蔔。後漢書

周顒長蔬食。王儉謂顒曰。卿山中何所食。顒曰。赤米白鹽綠葵紫

蓼。文惠太子問顒。菜食何味最勝。顒曰。春初早韭。秋末晚菘。南齊書

庾杲之爲尚書駕部郎。食惟有韭菹。菹韭生韭雜菜。或戲之曰。誰

謂庾郎貧。食鮭常有二十七種。言三九也。

蔡樽爲吳興太守。齋前自種白苣紫茄。以爲常餌。詔褒其清。南史

陶子鏘母嗜蓴。母沒後。恒以供奠。梁武義師初至。此年冬。營蓴不

得。子鏘痛恨。遂長斷蓴味。

周捨嘗居直廬。語及嗜好。裴子野言從來不食薑。捨應聲曰。孔稱不撤。裴乃不嘗。

邢峙仕齊。以經授皇太子。廚宰進太子食。菜有邪蒿。峙令去之。曰。此菜有不正之名。非殿下宜食。北史

五代時有僧藝蔬丐錢。一日晝寢。夢一金色龍食蒿苳。僧驚寤。見一偉丈夫取蒿苳食之。僧延之。餽食甚勤。且曰。富貴無相忘。偉丈夫乃藝祖也。既卽位。求其僧建寺。賜名普安。蓼洲閒錄

師達少孤。事母至孝。年十三。母疾。思藤花菜。達出城南二十餘里求得之。及歸。夜二鼓遇虎。達驚呼天。虎舍之去。母疾尋愈。明史

薛敬之母嗜韭。終身不食韭。

周定王櫛就藩開封以國土夷曠庶草蕃蕪考核其可佐饑饉者四百餘種繪圖疏之名救荒本草

破瓢道人吳孺子所至僦居僧寺自炊一銅竈飯不足則哺麋日買兩錢菜又異幹葉爲藿羹語人曰免我低眉向人覺飽逾梁肉

耳列朝詩集小傳

笋

韓侯出祖顯父餞之其蔽維何維筍及蒲

詩經

爾雅曰笋竹之萌說文曰笋竹胎吳錄云馬援至荔浦見冬笋名曰苞笋湘源縣十二月食班皮竹笋諸笋無以及之

北戶錄

筍一名筍一名筍一名筍一名竹胎一名竹芽一名筍一名初筍

筍譜

或問筍有五色章采否。對曰。江東黃筍。閒居賦有青筍。閒中賦有素筍。赤筍。錢塘多紫桂筍。自餘斑狸縹緗。不可勝言。

孟宗母嗜筍。冬時筍尚未生。宗入竹林哀歎。筍爲之出。得以供母。

楚國先賢傳

郭原平家種竹。夜有盜其筍者。原平遇見之。盜者走墜溝。原平乃於溝上立小橋令通。又採筍置籬外。隣里慚愧。無復取者。南史

盧栖洞在景寧縣。唐盧敖栖其中。洞旁多竹。其筍且佳。人號盧敖

筍。廣輿記

張戢爲司竹監。至舉家不食筍。宋史

宋孝宗問周必大吉安所產何物。對曰。金柑。玉版笋。銀杏。水晶葱。
廣輿記

穀王類編卷四十三

休寧 汪兆舒果齋輯

卉木類

松	柏	槐	桐	柳
竹	牡丹	芍藥	海棠	梅
桃	桂	菊	蘭	蓮
芝				

松

大荒之中有方山。上有青松。名曰拒格之松。日月所出入。山海經

千歲松樹。四邊枝起。上杪不長。望之如偃蓋。抱朴子

秦始皇上泰山封祀。既下。風雨暴至。休樹下。封其松為五大夫。通鑑

丁固歷官司徒。初固夢松樹生其腹上。謂人曰。松字十八公也。後十八歲。吾其爲公乎。卒如夢焉。吳書

陶弘景特愛松。風庭院皆植松。每聞其響。欣然爲樂。南史

張譏後主幸開善寺。名侍臣坐松樹下。敕譏。豎義時。索麈尾未至。後主令取松枝以屬譏。曰。可代麈尾。陳書

鄭薰以太子少師致仕。蒔松於庭。自號七松處士。唐書

張薦明隱山林。有古松十餘株。嘗謂人曰。余人之仙。此松本中之仙。清異錄

萍鄉縣寶積寺有羅漢松。宋黃山谷手植。名士多題詠。廣輿記

宋高宗得盤松一本。移植宮苑。奇秀絕倫。帝自爲贊。西湖游覽志

鮮于伯機得怪松一株植於齋前呼爲支離叟撫翫以爲適觀莊雜記

柏

新甫之柏詩經

諸侯墓樹柏五經通義

魯郡孔子舊廟柏樹二十四株歷漢晉其大連抱土人崇敬莫犯也宋書

江夏王鋒爲侍中及明帝持權藩邸危懼著修柏賦以見志曰旣殊羣而抗立亦含貞而挺正豈春日之自芳在霜下而爲盛衝風不能摧其枝積雪不能改其性雖坎壈於當年庶後凋之可詠南史

長壽二年萬象神宮側檉杉皆變爲柏柏貫四時不改柯易葉有

士君子之操。檉杉柔脆。小人性也。象小人居君子之位。唐書

御史臺前有柏二株。唐魏元同。張仁禕為御史時所植。杜易簡為

贊曰。爰有貞柏。徙植清臺。麝條霜勁。蠶葉風開。始逢鵲喜。終見烏

來。續通典

壺山有柏木一株。長數尺。半化為石。半猶是堅木。蔡君謨見而異

焉。因運置私第。余在莆陽。日親見之。墨客揮犀

寇準知巴東縣。嘗手植雙柏於縣庭。民以比甘棠。謂之萊公柏。政要

明高皇帝將兵取婺州。過蘭溪。見古柏甚奇。駐兵其下。後創亭繞

之。而空其中。夜半人望之。輒有蒼龍伏於其上。羣芳譜

槐

守宮槐葉畫詩宵炕。聶合也炕張也其葉畫合夜開者名守宮槐。爾雅

面三槐三公位焉。周禮

晉陽城北角有槐。一日之間三榮三悴。玉箱雜記

天街兩畔多槐木。俗稱為槐街。中朝故事

庾肩吾服槐實。年七十餘。目見細字。白髮反黑。梁書

韋孝寬為雍州刺史。先是路側一里置一土堠。經雨頽毀。每須修

之。孝寬敕部內。當堠處置槐樹。既免修復。又得庇蔭。周書

高顯領新都大監。每坐朝堂北槐樹下。以聽事。其樹不依行列。有

司將伐之。上特命勿去。以示後人。隋書

紐士雄喪父。廬於墓側。庭前有一槐樹。士雄居喪。樹遂枯死。服闋

還宅死槐復榮北史

吳湊爲京兆尹先是街樾稀殘有司蒔榆其空湊曰榆非人所蔭玩悉易以槐及槐成而湊已亡行人指樹懷之唐書

唐尙書省有古槐垂蔭甚廣夜深有絲竹之音省中卽有入相者俗謂聲音木因話錄

劉淳補周王右長史以正輔王端禮門槐盛夏而枯淳陳咎徵進戒王用其言修省枯枝復榮王旌其槐曰攄忠明史

桐

梧桐生矣于彼朝陽萃萃萋萋詩經

清明之日桐始華不華則歲有大寒古史考

桐和修上林苑一則下西京漢作四

益州有梧桐木其華采如絲人績以為布名曰華布華陽國志

梧桐山石間生者為樂器則鳴齊民要術

成王與弟叔虞戲削桐葉為珪以與叔虞曰以此封若史佚請擇

日王曰吾與之戲耳佚曰天子無戲言遂封叔虞於唐史記

初脩上林苑羣臣遠方各獻異樹桐三椅桐梧桐荆梧西京雜記

齊豫章王凝於邸起土山列種桐竹號為桐山南史

歷城房家園齊博陵君豹之山也其中雜樹森疎或有人折其桐

枝者君曰何為傷吾鳳條自後人不復折西陽雜俎

高祖宴侍臣於芳林之下因仰觀桐葉之茂曰其桐其椅其實離

離豈弟君子莫不令儀令林下諸賢足敷歌詠魏書

柳

裡河柳。旄澤柳。楊蒲柳。爾雅

漢苑中有柳狀如人形。號曰人柳。一日三眠三起。三輔故事

陶潛著五柳先生傳以自况。曰宅邊有五柳樹。因以爲號焉。晉書

益州獻蜀柳數株。枝條甚長。狀若絲縷。齊武帝以植於太昌靈和殿前。常賞玩咨嗟。曰此楊柳風流可愛。似張緒當年時。南史

高顯孩孺時。家有柳樹。高百許尺。亭亭如蓋。里中父老曰。此家當出貴人。顯後官僕射。封渤海郡公。隋書

呂渭爲禮部侍郎。始中書省有古柳。建中末枯死。德宗自梁還。復榮茂。人以爲瑞。柳渭令貢士賦之。唐書

白居易爲忠州刺史嘗植柳龍昌寺旁柳盛則寺興柳衰則寺敗僧護此柳比之甘棠

廣輿記

白樂天有楊柳詞曰一樹春風萬萬枝嫩於金色軟如絲永豐東角荒園裏盡日無人屬阿誰及宣宗朝國樂唱是詞帝問永豐在何處左右具以對遂命取永豐柳兩枝植於禁中

唐詩紀事

辛仲甫以右補闕出知光州先是州少種樹暑無所休仲甫課民栽柳蔭行路郡人德之名爲補闕柳

宋史

張唐英爲穀城令縣圃歲畦薑賣取息唐英至空其圃植千株柳作柳亭其中聞者咨羨

竹

渭川千畝竹。其人與千戶侯等。史記

其竹則籊籊簞簞。篠簞孤篁。緣延坻坂。澶漫陸離。阿那蓊茸。風靡

雲披。

張衡南都賦

其竹則簞簞林筵。桂箭射筒。柚梧有篁。簞簞有叢。苞筍抽節。往往
縈結。綠葉翠莖。冒霜停雪。櫛蠹森萃。蓊茸蕭瑟。檀欒嬋娟。玉潤碧
鮮。梢雲無以踰。嶰谷弗能連。鸞鷟食其實。鵲雛擾其間。左思吳都賦

舜南巡而葬於蒼梧之野。娥皇女英相與哭。淚下沾竹。竹文爲之

斑斑然。述異記

南中生子母竹。今之慈竹也。

漢章帝三年。子母筍生白虎殿前。時謂之孝竹。羣臣上孝竹頌。秦中

記

夜郎者其初有女子浣於遯水有三節大竹流入足間聞其中有號聲剖竹視之得一男歸而養之及長有才武自立爲夜郎侯以竹爲姓今夜郎縣有竹王神是也。後漢書

張薦隱居顧志家有苦竹數十頃張於竹中爲屋居其中王右軍聞而造之張避竹中不與相見。世說

王徽之卓犖不羈時吳中一士大夫家有好竹欲觀之便造竹下諷嘯良久主人灑掃請坐徽之不顧嘗寄居空宅中便令種竹或問其故徽之但嘯咏指竹曰何可一日無此君耶。晉書

太平興國八年蜀州獻瑞竹一本十六節上分兩枝。宋史

寇準卒雷州歸葬道出京南公安縣人皆設祭折竹植地挂紙錢踰月視之枯竹盡生筍衆因爲立廟

山中有竹莖如指竹杪細葉密翠如簞採以贈人謂之掃雲簞廬山記

條篁嫩篠對抽並引王子敬謂之扶竹武林山西雙竹院中產扶竹

卽雙竹
。竹譜

雞籠山國地多竹大至數拱長十丈以竹構屋覆之以茅廣且長

聚族而居明史

牡丹

洛陽牡丹爲天下第一其最著者曰姚黃出自姚氏魏紫出自魏

氏世稱花王。廣輿記

牡丹前史中無說。惟謝康樂集中云。水陸竹間多牡丹。西陽雜俎

高宗後苑宴羣臣。賞雙頭牡丹。賦詩。上官昭容有一聯云。勢如連

璧友。心似臭蘭人。天中記

天寶中。禁中初重木芍藥。得四本。紅紫淺紅通白者。植於沉香亭

前。會花開。上曰。賞名花。對妃子。焉用舊樂詞。遂宣李白作清平調

歌之。木芍藥卽牡丹。樂史

明皇時。有獻牡丹者。貴妃匀面。口脂在手。偶印於花上。詔裁於仙

春館。來歲花開。上有指印紅迹。帝因名爲一捻紅。青瑣高議

裴士淹過汾州。得白牡丹一株。移植長安私第。爲都城奇賞。西陽雜俎

宋張功甫於南湖園作牡丹會。衆賓旣集。問左右曰。香發未。答曰。已發。令捲簾。則異香自內出。羣妓以酒肴絲竹至。別有名妓數十。皆衣白。首飾衣領皆繡牡丹。首戴照殿紅。一妓奏歌侑觴。歌罷。樂作。乃退。復垂簾。談論自如。良久。香起。捲簾如前。易服與花而出。如是十回。所謳者。前輩牡丹名詞。客恍如仙遊也。西湖游覽志

王穉登能詩。有盛名。遊京師。客大學士袁煒家。試諸吉士紫牡丹詩。不稱意。命穉登爲之。有警句。煒名數諸吉士曰。君輩職文章。能

得王秀才一句耶。

明史。詩有色。借相君袍上。紫香分太極殿中烟之句。

芍藥

維士與女。伊其相謔。贈之以勺藥。詩經

芍藥一名將離。牛亨問曰：將離相贈芍藥何也？童子答曰：芍藥一名可離。將別故贈之。亦猶相招贈以文，無故文無名當歸。羣芳譜

芍藥一名婪尾。春胡嵩詩曰：瓶裡數枝婪尾春。時人莫喻。桑維翰

曰：唐宋文人謂芍藥為婪尾春。婪尾乃最後之盃。芍藥殿春，故有

是名。

合璧事類

江都芍藥凡三十二種。惟金帶圍者不易得。韓琦守郡時，偶開四

朶。時王珪為郡倅，王安石為幕官，陳升之以衛尉丞適至。韓公命

讌花下，各簪一朶。後四人相繼大拜，乃花瑞也。

後山叢語

維揚芍藥甲天下。居人以治花相尚。其品之上者有冠羣芳、寶粧

成、畫天工、曉粧新、點粧紅，凡三十二品。

王觀芍藥譜

東武舊俗。每歲四月大會於南禪資福兩寺。以芍藥供佛。今歲最盛。凡七十餘朵。中有白花正圓如覆盂。其下十餘葉承之。如盤。姿格迥出。因名玉盤盂。東坡詩序

海棠

惟紫綿色者。謂之海棠。餘悉棠梨花耳。有三種。曰貼梗。曰西府。曰

垂絲。陳思海棠譜

海棠爲花中神仙。海棠有色無香。惟蜀之嘉州者香。賈耽百

花譜

黃州定惠院東有海棠一株。特繁茂。蘇軾居黃時。必携客置酒。凡

五醉其下。東坡集

李丹授昌州倅。以去家遠。欲改授彭淵材曰。昌佳郡也。奈何棄之。

李問其故曰。海棠無香。惟昌州海棠獨香。非佳郡乎。墨客揮犀

徐儉樂道。隱於藥肆中。家植海棠。結巢其上。引客登木而飲。紺珠集

秋海棠一名八月春。草本。花色粉紅。甚嬌艷。葉綠色。此花有二種。

葉下紅筋者為常品。綠筋者有雅趣。枝上有種落地。明年自生。夏

便開。羣芳譜

梅

初修上林苑。梅七。朱梅。紫葉梅。紫花梅。同心梅。麗支梅。燕梅。猴梅。

西京雜記

蠟梅本非梅類。以其與梅同時。香又相近。酷似蜜脾。故名蠟梅。山谷謂京洛間有一種梅。類女工撚蠟所成。故以名之。張翊花經首

云一品九命。蠟梅亦在其中。蠟梅原名黃梅。

石湖梅譜

蠟梅有數種。以檀心磬口者爲佳。蘇軾詩。君不見萬松嶺上黃千

葉。玉蘂檀心兩奇絕。

咸淳臨安志

壽陽公主。人日卧含章殿簷下。梅花落額上。成五出之花。宮中效

之作。梅花粧。

宋書

何遜爲揚州法曹。廨舍有梅花一株。遜常吟咏其下。後居洛。思之

再請其任。抵揚州。花方盛開。遜對花。彷徨終日。不能去。

梁書

趙師雄居羅浮。一日天寒日暮。憇林間酒肆旁舍。見美人淡粧出

迎。師雄與語。言極清麗。芳香襲人。因叩酒家共飲。師雄醉寢。既覺。

乃在梅花樹下。惟見翠羽啁啾。參橫月落而已。

小窻清記

宋璟初困下僚時。蘇味道爲直指。璟投以梅花賦。蘇歎賞。名遂振。
廣輿記

王曾布衣時。以所業贄呂蒙正。有早梅句云。雪中未問和羹事。且
向百花頭上開。呂曰。此生次第已安排。作狀元宰相。後果然。
夢洲開錄

晏元獻移紅梅植西岡圃中。一日貴遊賂園吏。得一枝分接。由是

都下有二本。王君玉以詩遺曰。園吏無端偷折去。鳳城從此有雙

身。
石湖梅譜

張功甫爲梅園於西湖上。有古梅數十。增取紅梅合三百餘本。築

堂數間以臨之。又夾以兩室。東植千葉細梅。西植紅梅。各一二十

章。花時。居宿其中。環潔輝映。因名堂曰玉照。
西湖游覽志

袁豐居宅後有六株梅。開時嘆曰。冰姿玉骨。世外佳人。但恨無傾城笑耳。桂林志

張伯雨嘗從其師王壽衍入京。時燕地未有梅花。惟吳閒閒宗師自江南移植。護以穹廬。扁曰漱芳。伯雨造其所。恍遇西湖故人。徘徊既久。熟寢其中。覺而已曉。閒閒笑曰。伯雨素有詩名。宜有作。遂賦長詩。有風沙不憚五千里。翻身跳入仙人壺之句。閒閒大喜。送之翰林。集賢諸公和之。由是名大起。西湖志餘

王冕當元季。隱九里山。樹梅千株。桃杏半之。自號梅花屋主。善畫梅。求者踵至。以幅長短爲得米之差。明史

王圻歷官陝西布政參議。乞養歸。築室松江之濱。種梅萬樹。日曰

梅。花。源。以。著。書。爲。事。

桃

桃者五木之精也。能壓伏邪氣。制百鬼。故今人作桃符。著門上。壓

邪氣。此仙木也。典術

溱浦縣有桃花山。昔人嘗種桃千樹。至今呼桃花園。廣輿記

安期生以醉墨洒石上。皆成桃花。酉陽雜俎

晉太康中。武陵人捕魚爲業。緣溪行。忽逢桃花夾岸。數百步。盡水

源。便得山口入。豁然開朗。有黃髮垂髻。云先世避秦至此。搜神後記

北齊盧士琛妻。有才思。春日。以桃花和雪。齧兒面。祝之曰。取紅花。

取白雪。與兒洗面。作光悅。取白雪。取紅花。與兒洗面。作妍華。取花

紅取雪白。與兒洗面作光澤。取雪白。取花紅。與兒洗面作華容。史略

禁中有千葉桃花盛開。明皇與貴妃宴於樹下。曰。不獨萱草忘憂。

此花亦能銷恨。

開元遺事

劉禹錫作遊元都觀詩序曰。予貶朗州還京師。有道士植紅桃滿觀。如鑠晨霞。遂有詩以志盛。旋又出牧。於今重遊茲觀。蕩然無復一樹。因再題以俟後遊。其前篇有元都觀裡桃千樹。盡是劉郎去後栽。後篇有種桃道士今何在。前度劉郎又到來之句。舊唐書

棲霞嶺。宋時桃花燦爛。色如凝霞。故名。

西湖遊覽志

桂

桂樹叢生兮。山之幽。攀援桂枝兮。聊淹留。

淮南王詩

昭帝起桂臺以望遠。有一連理桂樹。上枝跨渠水。下枝隔岸而南。生與上枝同一株。拾遺記

南唐後主嘗召徐鉉至清暑閣。閣前草生磚縫中。薙去復生。鉉曰。呂氏春秋云。桂枝之下無雜木。味辛故也。後主令取桂屑數斗。勻布縫中。經宿草盡死。談苑

無瑕嘗著素裳折桂。明年開花潔白如玉。女伴折取簪髻。號無瑕玉花。王路花史

月桂峯。宋天聖中秋月甚朗。降靈寶於茲山。狀若珠璣。有異人識之曰。此月中桂子也。遂以名峯。西湖遊覽志

黃龍寺晦堂嘗問山谷以吾無隱乎爾之義。山谷詮釋再三。晦堂

不答。時秋香滿院。晦堂因問曰。聞木犀香乎。山谷曰。聞。晦堂曰。吾無隱乎爾。山谷乃服。世說

象山縣有紅木犀。宋高宗嘗移植禁中。廣輿記

杭州天竺桂。有黃紅白三色。張九成憶天竺桂詩。湖上北山天竺寺。滿山桂子月中秋。黃英六出非凡本。肯許天香過別州。自注天竺種。他州無本。西湖志

菊

女兒之山。其草多菊。山海經

月令以動植志氣候。如桃桐直云始華。至菊。獨曰菊有黃華。豈以其正色獨立。不伍衆草歟。且其性介烈高潔。必待霜降。草木黃落。

而始開有類於幽人逸士之操故名勝之士多愛之花有勝金黃

疊金黃太真黃御袍黃又有金鈴毬子金杯玉盤等名范至能菊譜

英英麗草稟氣靈和春茂翠葉秋耀金華布護高原蔓衍靈阿揚

芳吐馥載芬載葩爰採爰拾投之醇酒御於王公以介眉壽服之

延年佩之黃耆文園賓客乃用不朽傅克妻辛氏秋菊頌

酈縣甘谷有大菊水從山上流下得其滋液飲此水者多壽風俗通

晉陶淵明獨愛菊予謂菊花之隱逸者也周惇頤愛蓮說

蘭

余既滋蘭之九畹兮又樹蕙之百畝冀枝葉之峻茂兮願俟時乎

吾將刈離騷

蘭山在宜賓界。蘭生於深林。有春蘭、秋蘭、崇蘭、鳳尾蘭、竹蘭、石蘭諸名。春蘭花生在葉之下。崇蘭花在葉之上。圖經

御蘭山在永春縣。其上產蘭。有一莖三十花者。異於常植。廣輿記

鄭文公有妾燕姑。夢天使與已。蘭曰：以是爲而子。以蘭有國香。人

服媚之如是。旣而文公見之。與之蘭而御之。生穆公。名之曰蘭。左傳

孔子自衛反魯。見香蘭獨茂。歎曰：蘭當爲王者香。今乃與衆草伍。

乃援琴鼓之。作猗蘭操。琴操

幽蘭生於空谷。不以無人而不芳。梁昭明太子集

羅含致仕還家。庭中忽蘭桂叢生。人以爲德行之感。羅含別傳

王摩詰貯蕙蘭。用黃磁斗。養以綺石。累年彌盛。世說

羅崎為滁州刺史。於堂前植蘭數十本。為之記曰。子之於蘭猶賢朋友。朝襲其馨。暮擷其英。携香就觀。引酒對酌。

宋稗

破瓢道人吳孺子。樹蘭百本。花時。閉室以護香氣。有索看者。窻中

捉鼻作兒女聲拒之。

列朝詩集小傳

蓮

芙蕖一名荷華。一名水芝。一名澤芝。一名水花。

古今注

蓮其葉名荷。其華未發為菡萏。已發為芙蓉。

本草

衿菱茄之綠衣兮。被夫容之朱裳。

茄亦荷字。反離騷。

華山頂有池。生千葉蓮花。服之羽化。

華山記

九疑山澗中有黃色蓮花。芳氣竟谷。

神境記

予獨愛蓮之出污泥而不染。濯清漣而不妖。中通外直。不蔓不枝。香遠益清。亭亭淨植。可遠觀而不可褻玩焉。予謂蓮花之君子者也。愛蓮說

漢昭帝淋池中植分枝荷。一莖四葉。狀如駢蓋。日照則葉低。蔭根名曰低光荷。芬馥之氣徹十餘里。拾遺記

靈帝西園渠中植蓮。其葉夜舒晝卷。一莖有四蓮叢生。名曰夜舒荷。亦云月出則舒也。曰望舒荷。

遠法師居廬山東林寺。有白蓮花。與陶靖節十八人同修淨土。號

白蓮社。

晉書

石勒召佛圖澄。試以道術。澄取鉢盛水咒之。須臾鉢中生青蓮花。

光色耀日。勒由此信之。

晉安王子懋七歲時。母阮淑媛病危篤。請僧行道。有獻蓮花供佛者。僧以銅罌盛水漬其莖。子懋流涕禮佛曰。若使阿姨因此和勝。

願佛令花竟齋不萎。七日齋畢。花更鮮紅。南史

文帝元嘉十年。天淵池芙蓉異花同蒂。宋書

高祖天監十年。嘉蓮一莖三花生樂遊苑。梁書

藕出西湖者。甘脆爽口。匾眼者尤佳。其花有紅白二種。白者香而結藕。紅者艷而結蓮。瞿宗吉詩云。畫閣東頭納晚涼。紅蓮不及白。

蓮香是也。西湖游覽志

芝

赤芝一名丹芝。黃芝一名金芝。白芝一名玉芝。黑芝一名元芝。紫

芝一名木芝。本草

仙都有芝圃。悉種靈芝。或如車騎。或如華蓋。或如樓閣。或如飛鳥

五色。廣異記

王者敬事耆老。不失舊故。則芝草生。瑞應圖

武帝元封二年。詔曰。甘泉宮內中。產芝九莖連葉。上帝博臨。不異

下房。賜朕卬休。其赦天下。作芝房之歌。漢書

宣帝元康四年。金芝九莖。產於函德殿銅池中。

天寶中。有玉芝。產於大同殿之柱礎。一本兩莖。神光照於殿。唐書

上元三年。延英殿御坐生白芝。一莖三花。肅宗製玉靈芝詩三篇。

羣臣皆賀。三年，含輝院生金芝。

韓思復爲滁州刺史，有黃芝五。生州署，民爲刻頌其祥。

杜荀鶴庭前椿樹生二芝。明年及第，因名之曰科名草。

太祖開寶七年，陳州貢芝草一本，四十九莖。宋史

李庭芝生時，有芝產屋棟。鄉人聚觀，以爲生男祥也，遂以名之。

萬觀補平陽知府，政績益茂。有芝生堯祠棟上，士民皆言使君德

化所致。觀曰：太守知奉職而已，芝非吾事也。明史

王金，鄠縣人也。爲國子生，殺人當死，逃京師。一日，世宗於秘殿扶

乩，言服芝可延年，使使採芝天下。四方來獻者，皆積苑中。中使竊

出市，人復進之以邀賞。金厚結中使，得芝萬本，聚爲一山，號萬歲

芝山又僞爲五色龜進之帝大喜遣官告太廟授金太醫院御醫。

穀玉類編卷四十四

休寧 汪兆舒果齋輯

果實類

桃	李	梅	杏	梨
柿	橘	櫻桃	楊梅	石榴
葡萄	甘蔗	棗	栗	荔枝龍眼
瓜	菱			

桃

旄冬桃。欖桃。山桃。桃冬熟者名旄生山中者名欖桃。爾雅

東海度索山有大桃樹。屈蟠數十里。曰蟠桃。十洲記

崑崙山有玉桃。光明而堅瑩。須以玉井泉洗之。便軟可食。日本國

有金桃其實重一斤。述異記

孔子侍坐於魯哀公。哀公賜之桃。與黍。仲尼先飯黍而後噉桃。哀公曰。黍以雪桃也。對曰。北知之矣。夫黍五穀之長。而桃爲下。君子以賤雪貴。不聞以貴雪賤也。韓詩外傳

彌子瑕見愛於衛君。食桃而甘。不盡而奉君。君曰。愛我哉。忘其口而念我。及彌子色衰愛弛。君曰。是嘗食我以其餘桃。史記

初修上林苑。羣臣遠方各獻名果異樹。桃十秦桃。欖桃。緇核桃。金

城桃。綺葉桃。紫文桃。霜桃。胡桃。櫻桃。含桃。

西京雜記

武帝候西王母。王母至。玉盤盛仙桃七顆。以四與帝。帝食。輒收其

核。王母曰。此桃三千年一生寔。中夏地薄。種之不生。帝乃止。

漢武內傳

華林園中有仙人桃。表裏照徹。俗傳出崑崙山。一曰王母桃。伽藍記

康國獻金桃銀桃。太宗詔令植苑中。唐書

世宗夜坐庭中。獲一桃。御幄後。左右言自空中下。帝大喜。曰。天賜

也。修迎恩醮五日。明史

李

休無實李。座接慮李。駁赤李。爾雅

初修上林苑。李十五。紫李。綠李。朱李。黃李。青綺李。青房李。同心李。

車下李。含枝李。金枝李。顏淵李。羌李。燕李。蠻李。侯李。西京雜記

琳國出玉葉李。色如碧玉。數十年一熟。昔韓終嘗餌此李。因名韓

終李。洞冥記

乾藤字從州不從行

魏文帝安陽殿前天降朱李八枚。啖一枚。可數日不食。今李種有安陽李。大而甘者。卽其種。述異記

杜陵有金李。李大者。謂之夏李。尤小者。呼爲鼠李。

房陵定山有朱仲李園。三十六所。潘岳閒居賦云。防陵朱仲之李。李尤果賦云。三十六園朱李是也。中山有縹李大如拳者。呼仙李。李尤果賦曰。如拳之李。陸士衡果賦曰。山中之縹李。又云。仙李縹而神李紅。

和嶠家有好李。武帝求之。與不過數十。

晉書

王戎少與羣兒戲道側。見李樹多寔。等輩競趨之。戎獨不往。或問其故。戎曰。樹在道邊而多子。必苦李也。取之信然。

王僧孺少時有餽其父李先以一與之不受曰大人未見不容先嘗齊書

明宗不豫馮道入問曰寢膳之間尤宜調謹因指御前果實曰如食桃不康他日見李思戒瑣言

東都嘉慶坊有李樹其實甘鮮為京都之美故稱嘉慶李今人但

言嘉慶子也韋述兩京記

立夏日俗尚噉李時人語曰立夏得含李能令顏色美故是日婦人作李會取李汁和酒飲之謂之駐色酒說林

梅

饋食之籩其實乾篠乾篠梅也周禮

魏武嘗行失汲道軍皆渴乃令曰前有大梅林饒子甘酸可以解渴士卒聞之口皆出水乘此得及前源世說
范汪至能噉梅有人致一斛奩須臾噉盡

杏

初修上林苑杏二文杏蓬萊杏

西京雜記

杏園洲在南海中多杏海上人云仙人種杏處漢時有人舟行遇風泊此洲五六日食杏故免死洲中别有冬杏述異記

濟南郡有分流山生金杏味爲獨美漢武訪蓬瀛有獻是者帝嘉之故呼爲漢帝果

西陽雜俎

董奉居廬山爲人治病病愈者使栽杏鬱然成林杏子熟作一草

倉示人曰買杏者將穀一器置倉中自取一器杏去嘗有人置穀少而取杏多林中虎出逐之大怖急走顛覆至家量杏一如穀多少神仙傳

張元年六歲南隣有二杏樹杏熟多落元園中諸小兒競取食之元所得者送還其主周書

梨

初修上林苑梨十紫梨青梨芳梨大谷梨細葉梨縹葉梨金葉梨
瀚海梨東王梨紫條梨西京雜記

梨數種大者幾如盃有青黃紫三色肉白於雪核少食之甘脆咽
查滓者為佳品另一種熟時糜爛可口謂之金鳳梨亦其次也格物

叢話

太上之果有元光梨。漢武內傳

塗山之背梨大如升紫色千年一花亦曰紫輕梨。洞冥記

御宿園出大梨落地則破其取梨先以布承之號曰含消。三輔黃圖

張公大谷之梨。潘岳閒居賦

桓南郡每見人不快輒嘆云君得哀家梨當復不蒸食不。秣陵有哀仲梨

美。世說

中書郎張敷小名查父邵小名梨文帝戲之曰查何如梨敷曰梨

為百果之宗查何可比。宋書

高聰以高肇之黨廢於家惟修營園果世稱高聰梨以為珍異。北史

陝州峽石縣山中有梨一株甚偉貞觀初鳳止此梨其後結寔尤大世名鳳棲梨紀異記

肅宗嘗夜召穎王等坐地爐上時宰相李泌久絕粒上自燒二梨以賜之因與諸王聯句曰夜枕九仙骨朝披一品衣不食千鍾粟

惟餐兩顆梨李泌別傳

崔遠文才清麗風神峻整當時目爲飢坐梨言席上之珍唐書

柿

柿以核少者爲佳南劍尤溪柿處州松陽柿最爲奇品格物論

柿有七絕一壽二多陰三無鳥巢四無虫蠹五霜葉可玩六嘉實

七落葉肥大爾雅翼

梁侯烏桲之柿。

閒居賦

懸霜照彩。凌冬挺潤。甘清玉露。味重金液。

梁簡文謝東宮賜柿啟

橘

揚州厥包橘柚錫貢。

書經

盧橘大而甘。夏熟。土人呼爲壺橘。

廣州記

橘山在嚴州府城南。上有羅浮橘一株。熟時風飄墮地。得者訛傳

仙橘云。

廣輿記

橘白華赤實。自漢武帝交趾有橘。官長一人主貢御橘。吳黃武中。

交趾太守士燮獻橘十七實。同一蒂。以爲瑞異。

南方草木狀

楊由爲成都文學掾。少治易。曉占候。忽有風起。太守問由。由曰。南

方有薦朱實者。色黃赤。頃之。五官掾獻橘數包。益部耆舊傳

陸績年六歲。見袁術。術出橘。績懷三枚去。拜辭墮地。術曰。陸郎作客而懷橘乎。績曰。欲歸遺母。術大奇之。吳志

丹陽太守李衡。遣客于武陵龍陽洲上。種柑橘千株。臨死。勅兒曰。汝母惡我治家。故窮如是。然吾州里有千頭木奴。歲上一匹絹。亦可用。及吳末。衡柑橘成。歲得絹數千疋。襄陽記

江陵進乳柑橘。上種於蓬萊宮。結一合歡實。上與妃子持翫。曰。此果似知人意。楊妃外傳

巴郡有橘園。霜後橘盡。取餘大橘剖開。中有二叟相對象戲。一叟曰。橘中之樂。不減商山。但不得深根固蒂。為愚人摘下耳。幽怪錄

櫻桃

楔荆桃

楔一名荆桃。今櫻桃也。爾雅

櫻桃一名朱棗

一作牛桃

一名麥英。味甘。主調中益脾氣。令人好顏色。

美志氣

呂氏本草

仲夏之月。天子以雛嘗黍。羞以含桃。先薦寢廟。

禮記

惠帝春游離宮。叔孫生曰。古者有春嘗果。方今櫻桃熟。可獻。願陛下

下出。因取櫻桃獻宗廟。上許之。

史記

明帝宴羣臣。大臣進櫻桃。以赤瑛盤賜羣臣。月下視之。盤與櫻桃

同色。羣臣皆笑。云是空盤。

東觀漢記

上命侍臣升殿食櫻桃。並盛以琉璃。和以杏酪。末後大陳宴席。人

賜朱櫻二籠

景龍文館記

唐朝三月宰相有櫻筍厨時最爲盛又秦中三月爲櫻筍時

山堂肆考

唐新進士有櫻桃宴

摭言

楊梅

羅浮山頂有胡楊梅人登採拾止得於上飽噉不得持下林邑山

楊梅大如杯椀味如蜜以醢酒號梅香酎

南方草木狀

梁國楊氏子聰慧孔君平詣其父父不在兒出爲設果果有楊梅

孔指以示兒曰此君家果兒答曰未聞孔雀是夫子家禽

世說

王虛之庭中楊梅樹隆冬三實時人以爲孝感所致

南史

故章縣北有石榔山上生楊梅常以貢御

吳興記

揚州人呼楊梅爲聖僧。羣碎錄

石榴

漢張騫使西域還得安石榴。博物志

石榴甜者謂之天漿。能已乳石毒。西陽雜俎

頓孫國有安石榴。取汁停杯中。數日成美酒。扶南傳

白馬村出石榴。其大如斗。甜如蜜。人有得者。交相餽送。語曰。白馬

石榴。一實值牛。鄴中記

吳王以潘夫人遊昭宣之臺。盡酣醉。唾於玉壺中。使侍婢瀉於臺下。得火齊指環。卽挂石榴枝上。因起臺。名曰環榴臺。時有諫者云。今吳蜀爭雄。還劉之名。將爲妖矣。乃翻其名曰榴環臺。拾遺記

安德王延宗納李祖收女爲妃。後顯祖幸李宅宴妃母宋氏。薦二石榴於帝前。問諸人莫知其意。帝投之。魏收曰：石榴房中多子。王新婚。妃母欲子孫衆多。帝大喜。詔收還將來。

北齊書

瑞榴軒在邵武縣學。宋時有石榴一株。士人觀其結寔之數。以卜科第多寡。屢驗。

廣輿記

王荆公作內相。翰院有石榴一株。枝葉繁茂。只發一花。時荆公有詩云：萬綠叢中紅一點。動人春色不須多。

直方詩話

葡萄

貝邱之南有葡萄谷。谷中葡萄但可就食。或有取歸者。卽失道。世

言王母葡萄也。

酉陽雜俎

大宛以蒲萄爲酒。富人藏酒至萬餘石。久者數十歲不敗。史記

李廣利爲貳師將軍。破大宛。得蒲萄種歸漢。漢書

陳叔達爲黃門侍郎。嘗賜食。得蒲萄不舉。高祖問之。對曰。臣母病渴。求不能致。願歸奉之。帝流涕曰。卿有母遺乎。因賜之。唐書

太宗破高昌。收馬乳蒲萄實。種於苑中。併得其酒法。仍自損益。造酒成。綠色。芳香酷烈。味兼醍醐。

波斯國磨鄰老勃薩。歲獻貴人蒲萄。大者如雞卵。

柳城卽後漢柳中地。西域長史所治。四面皆田園。流水環繞。樹木陰翳。有桃李棗瓜胡蘆之屬。而蒲萄最多。小而甘。無核。名鎖子葡

萄。明史

甘蔗

秦尊柘漿折朝醒。

柘與蔗同。甘蔗汁可解醒也。漢書

甘蔗所在皆植。而遂寧爲冠。蔗有四色。曰杜蔗。曰西蔗。曰芳蔗。本

草所謂荻蔗也。曰紅蔗。本草崑崙蔗也。

王灼蔗譜

交趾有甘蔗。圍數寸。長丈餘。頗似竹。斷而食之。甚甘。竿取汁。曝數

時成飴。入口消釋。彼人謂之石蜜。

南中八郡志

扶南蔗一丈三節。見日卽消。風吹卽折。

世說

雩都縣土壤肥沃。偏宜諸蔗。味及彩色。他縣所無。

南康記

予又學擊劍。常與平虜將軍劉勲。奮威將軍鄧展等共飲。宿聞展善有手臂。曉五兵。又能空手入白刃。余與論劍良久。因求與余對。

時酒酣耳熱。方食竿蔗。便以爲杖。下殿數交。三中其臂。左右大笑。

魏文帝典

論自序

顧愷之食甘蔗。恒自尾至。本人或怪之。云漸入佳境。晉書

庾沙彌母劉氏亡。劉好噉甘蔗。沙彌遂不食焉。南史

扶南赤土國。以甘蔗作酒。味香美。隋書

棗

棗。壺棗。邊要棗。欖白棗。楓酸棗。楊徹齊棗。遵羊棗。洗大棗。煮填棗。
蹶洩苦棗。皙無寔棗。還味。陰棗。爾雅

八月剝棗。詩經

周文弱枝之棗。閒居賦

北方荒中有棗林其子長六七寸熟赤如朱氣味潤澤故赤松子

云北方大棗味有殊既可益氣又安軀神異經

上林苑棗七弱枝棗玉門棗棠棗青葙棗楞棗赤心棗西王棗西京

雜記

嶗嶠細棗出嶗嶠山萬年一實如今之軟棗咋之有膏西王母以

獻武帝洞冥記

李少君言於上曰臣嘗遊海上見安期生食臣棗大如瓜史記

王吉少居長安東家有大棗樹垂吉庭中吉婦取棗以啖吉吉後

知之乃去婦東家聞而欲伐其樹鄰里共止之因固請吉令還婦

里中為之語曰東家有樹王陽婦去東家棗完去婦復還漢書

大將軍王敦初尚武帝舞陽公主如廁見漆箱中盛棗本以塞鼻王謂廁上陳果遂食之羣婢莫不笑之世說

海棗五年一實大如盃盃味極甘美晉太康五年林邑獻百枚南方

草木狀

蕭衍直閣將軍於郁州內附詔遣奚康生迎接并賜棗果面敕曰果者果如朕心棗者早遂朕意魏書

華林園中有仙人棗長五寸核細如針食之甚美俗傳出崑崙山

一曰王母棗伽藍記

武昌府有僊棗亭舊傳亭前棗樹未嘗結實一歲忽有實如瓜太守命小吏採進小吏私啖之遂仙去廣輿記

栗

上林苑栗。四侯栗。榛栗。瑰栗。嶧陽栗。嶧陽都尉曹龍所獻大如拳。西京雜記

栗五方皆有。周秦吳揚特饒。唯漁陽范陽栗。甜美味長。他方不及

也。倭韓國土栗如雞子。亦短味不美。詩義疏

漢武帝果園大栗十五枚一斗。辛氏三秦記

鄴中產巨栗。脫其殼可以爲杯。鄴中記

固安之栗。天下稱爲御栗。因有栗園。括地志

劉秀之從叔穆之爲丹陽尹。與子弟宴集廳事。柱有一穿者。穆之

曰。汝等各以栗遙擲穿處。必得此郡。惟秀之栗獨入焉。後果驗。宋書

侍中蕭琛預御筵。醉伏。梁武帝以棗投琛。琛乃取栗擲上。中面帝

動色琛曰陛下投臣以赤心臣敢不報以戰栗上悅

南史

王泰幼敏悟祖母散栗于牀羣兒競取之泰獨不取曰不取當自得賜人皆異之

世說

易延慶母平生嗜栗延慶種二栗樹墓側二樹連理

宋史

蕭韓家奴爲彰愍宮使興宗嘗問曰卿居外有異聞乎對曰臣惟知炒栗小者熟則大者必生大者熟則小者必焦使大小均熟始爲盡美蓋嘗掌栗園故託栗以諷諫

遼史

荔枝龍眼

修幹紛錯維葉蓁蓁灼灼若朝霞之映日離離若繁星之著天皮似丹罽膚若明璫潤侔和璧奇踰渭璜仰歎麗表俯嘗嘉味口含

丹液心受芳氣卓羣類而無儔超衆果而獨貴

王逸荔枝賦

漢武帝破南越建扶荔宮以荔枝得名也其實則歲貢焉荔枝過

卽龍眼熟故龍眼謂之荔奴魏文帝詔曰南方果之珍異者有龍

眼荔枝令歲貢

草木狀

舊南海獻龍眼荔枝十里一置五里一候奔騰阻險死者繼路和

帝時臨武長唐羌上書陳狀帝下詔勿復受獻由是遂省

後漢書

江州縣有荔枝園至熟時二千石常設厨膳令士大夫會樹下食

之

華陽國志

楊貴妃嗜荔枝必欲生致之乃置騎傳送走數千里味未變已至

京師

唐書

宋仁宗一日思生荔枝。有司言已供盡。近侍曰。有鬻者。請買之。上曰。不可。令買來。歲必增上供之數。流禍百姓無窮。宋史

興化府產荔枝。蔡君謨荔枝譜。以宋家香爲上品。宋氏嘗以饋公。

公謝以詩。羣芳譜

福州府產荔枝。按譜有十八娘紅。狀元紅。將軍紅。皆絕品。又產龍眼。

瓜

爲天子削瓜者副之。巾以絺。爲國君者華之。巾以綌。爲大夫累之。

士薺之。庶人齧之。禮記

水芝者。白瓜。甘瓜也。本草經

滄州產分蒂瓜。長二尺。其色如樵。一顆一蒂。杜陽編

有青燈瓜。大如三斗魁。元表丹裏。呈素含紅。攬之者壽。食之者仙。
列仙傳

有龍肝瓜。生於冰谷。所謂冰谷素葉之瓜。仙人瑕邱仲得此食之。
千歲不渴。洞冥記

梁宋就爲邊令。與楚隣界。邊亭皆種瓜。梁人劬力數灌其瓜。瓜美。
楚人稀灌其瓜。瓜惡。楚令惡梁亭之賢。已夜竊搔梁瓜。有死焦者。
梁人欲報搔之。就曰。何可構怨。乃每暮夜令人竊灌楚亭之瓜。瓜
日以美。楚亭怪而察之。乃梁亭也。楚王聞之愧。乃謝以幣。新序

召平者。故秦東陵侯。秦破爲布衣。種瓜於長安城東。瓜美。世俗謂

之東陵瓜從召平以爲名也。史記

漢明帝時燉煌獻異瓜名穹隆長三尺味美如飴昔道士從蓬萊

山得此瓜云是崆峒靈瓜四劫一實。拾遺記

安帝元初三年有瓜異本共生八瓜同蒂時以爲嘉瓜。後漢書

吳桓王時會稽生五色瓜吳中有五色瓜歲充貢獻。述異記

郭原平以種瓜爲業大明七年大旱瓜瀆不通船縣官劉僧秀愍

其貧老開瀆下水與之原平曰天旱百姓俱困豈可減溉田之水

以通運瓜之船乃悉從他道往錢塘貨賣。宋書

滕曇恭年五歲母楊氏患熱思食寒瓜土俗所不產曇恭歷訪不能得銜悲哀切俄遇一桑門問其故曇恭以告桑門曰我有兩瓜

分一相遺。還以與母。尋訪沙門。莫知所在。

南史

韓靈敏與兄靈珍並有孝性。母亡。家貧無以營凶。兄弟共種瓜。朝採瓜子。暮生已復。遂辦葬事。

郭祚以僕射領太子少師。曾從世宗幸東宮。懷一黃瓠奉肅宗。時趙桃弓爲世宗所信。祚私事之人。號祚爲桃弓僕射。黃瓠少師。魏書

明崇儼以奇技名。高宗四月憶瓜。崇儼索百錢。須臾以瓜獻。曰得之緱氏老人圃中。帝召老人問故。曰埋一瓜失之。土中得百錢。唐書

建寧王倓賜死。明年廣平王收二京。使李泌獻捷。泌與肅宗從容語。泌曰陛下嘗聞黃臺瓜乎。高宗長子弘爲太子。天后鴆殺之。而立次子賢。賢日憂惕。乃作樂章使工歌之。欲以感悟上及后。其曰

種瓜黃臺下。瓜熟子離離。一摘使瓜好。再摘令瓜稀。三摘尚云可。四摘抱蔓歸。陛下今一摘矣。慎無再。時廣平亦爲張后所構。故必因對及之。

宋蔡君安會館職於道山食瓜。令坐客徵瓜事。客不敢盡言。君安所徵爲優。校書郎董彥遠連徵數事。皆所未聞。客咸歎服。揮麈錄楊榮進右諭德直內閣。永樂五年命往甘肅經畫軍務。還奏武英殿帝大悅。值盛暑。親剖瓜噉之。明史

菱

菱一名蔞櫟。爾雅

楚謂之芰。秦謂之薜荔。說文

三角四角曰菱。兩角曰菱。武陵記

元都翠水中有菱碧色。狀如雞飛。亦名翔雞菱。仙人鳧伯子常采而食之。令骨輕。身生毛羽。洞冥記

靈池中有浮根菱。根出水上。葉沉波下。霜降彌美。因名青冰菱。

屈到嗜菱。有疾。召其宗老屬之曰。祭我必以菱。及祥。宗老將薦菱。屈建命去之。曰。夫子不以其私欲干國之典。國語

漢昭帝淋池中有倒生菱。根浮水上。實沉泥中。名紫菱。食之不老。拾遺記

魚卵。爲湘東王鎮西司馬。述職西上道中。乏食。緣路采菱。作菱米飯。給所部。卵度之所。後人覓一菱不得。南史

劉邑才敏捷。帝詔詠採菱調。下筆卽成。

梁書

穀玉類編卷四十四

